

郝文忠公全集



郝文忠公陵川文集卷一

高都 王鏐 涵紫 編訂

賦

擊蛇笏賦

并引

孔公原魯孔子之裔孫也仕宋祥符間嘗以笏擊祗蛇其事其節則有臨川之誌徂徠之銘王偁之傳在其笏則歸于今張文彥遠經晚進曲學固不足贅于諸公之未然義激于中而有不能已焉者謹賦而廣之其辭曰
昔仲尼之得政也兵裔夷尸姦宄藏甲出大都圮魯宴而齊沮王道之端于是乎啓奈之何天不假命遽行而遽止

其餘威遺烈鉞于筆而鈇于禮誅十二公之亂臣二百四十二年之賊子壓之以大經束之以大法莫敢瀆彝倫而擾天紀孰意其孽魄狙而不散逆靈締而不弭蟠結乎大塊之阿囚鎖乎九原之底乃卵狼而孕戾不矜廉而厲恥每間治而為亂輒張慝而掩媿代謝屈信閱越于祀以及于宋化祆蛇而陸起窟宅乎廟堂馮附乎神鬼蜿蜿蜒蜒曳曳頽頽伸腹偃脊呀口侈噬呈露怪狀愕目奪視侈大澤之運動常山之勢愚吏蚩氓崩角蹶趾醜酒血牲匍匐祈祀若新莽盜國而無知之民共稱符瑞狂巫顛覲踴躍驚喜稱為神龍因緣為市若賊操竊權而嗜利之士爭為

役使妖聲異聞鼓舌轟耳喁訛唱和謹呶叫噪震一郡而
駭千里莫之敢詰亦莫之敢訛聖有賢孫釋褐于是端笏
而前山立顧指蓄銳俟發

若子房之睨秦始奮
笏而擊顙拆身弛袂死于心毒搖于尾若太尉之擊朱泚
於是惑民雨解義士風靡天子是嘉用為御史司國之直
致國于理而諫中宮之廢折遼主之誚邁節特操凜乎清
霜皦乎白日雲高而山嶷是仲尼之以直道詒厥子孫俾
萬世如矢者不屈不撓拔邪樹正賞善誅惡無時而已也
則是笏也與誅卯刃脩經筆兵萊人戈叩原壤杖隋三都
鋪異時而同跡仲尼為不死矣嗚呼叔世而下蛇龍混螫

春雷瘖而不鳴直道僨而不植已刳方而爲圓又枉尋而直尺誣譎誕僞異態百出有蕩俗惑衆乘高而爲姦若茲穴廟之蛇有巧發毒伺中人而不可測若含沙之蠃者有之笏也無之人也孰爲之擊也

哀三都賦

有序

李唐亡長安洛陽遂虛梁篡而汴始建五代荐國日益殷富逮宋受禪太祖以汴土薄易無四塞之固且非王者處上游之勢也議遷都長安而太宗與大臣不從太祖曰今汴所利者近漕江淮之粟耳不及百年民力殫矣至宣政間民雖繁夥皆游食不本著佻靡相矜益之以黨禍重之

以侈政老姦擅國黠闇用事敗盟開邊而宋果亡金源氏
都燕挾河朔之勢以雍洛汴為邊鎮既失河朔始南走汴
金亡而汴亦虛迄今二十餘年百王之制度九州之壯觀
寢以蕪替遂無子遺神州陸沉永為邱墟可哀也已於是
作哀三都賦其辭曰

維帝極之弗建致神器之顛趾德者斃而覆宗力者踣而
沉祀兌銳缺而兵頓坤靈黑而士死天王之所居衆大之
所止頽野馬而蕩滅走城狐而傾圮噫吁咿嘻伊誰之始
乘厥權輿遐哉邈矣亡國之蹤自西而東吞聲隕涕原始
要終昔明皇之臨御恃開元之駿功抑漢魏而濶視攀三

五以比隆謂天崩與地陷可宴安以無窮學霓裳於天上
養祿兒於宮中侈幾一動姦臣愚弄欲未足心禍不旋踵
割一統以幾絕耨兩河之盜種陵夷僖昭孽臣姦驕睥睨
問鼎倔强不朝巢以饑熾温用盜帝刼乘輿以入洛血椒
蘭而行弑剗咸陽之故基祝萬世之元氣舍洛邑而弗居
陋姬旦之王制噫嘻嗚呼兩京遂蕪中夏壯觀削于汴都
迄用定命蔑為訐謨龍蛇起陸競為闕關閱五季如傳舍
啓二猪之永圖戢干戈以禮樂化殘暴以詩書豈期百年
弗戡顧天漢黨復錮唐闡再權壞法亂紀拔本塞源旣崇
侈而肆欲復敗盟而開邊東南朝廷種兩蔓菁華石網運

太湖浪驚祖宗之澤盡華陽之宮成引金源於海上揭汴
底而一傾忘社稷之實禍慕燕雲之虛名二帝北虜一馬
南渡孽不自天勢成崩土有臣不臣假王張楚有民弗民
依國齊豫靈光巋然幸無一炬鼠寶座以飛嘯燕雕梁而
不語何故新之多變竟不知其誰主粵惟金源國一再傳
舉玄菟與肅慎繩遼武而帝燕合夷夏之制度成一典而
煥然去唐宋惟一間詎元魏之敢先而乃馭失其道潛朽
其索北陸翻沙蕭牆禍作公孫于邾王遷于洛日入崦嵫
寢適冥漠駐汴宮為王所不甘卑而分弱藉二京之形勢
跨關中與河朔雖日窘而日蹙猶天矯以磐礴俾早為之

定鼎不遂至于墜落嗚呼噫嘻商於雪飛車說其輻火焚
其旗一僨塗地三都遂隳彗哲王之偉蹟剝列聖之不基
俘梁亡之庾信走吳滅之陸機宁區中以馳矚悵掩袂而
興悲碧雲高寒何處長安澧水有芭涇水有蘭熒不見人
慨乎其嘆漢室金莖東移淚潛茂陵玉盃暴出人間愁甃
兮貫天淒風兮射關覽冠蓋兮弗復音蕝音帝東游兮何當
還維終南之峻極與太華之孱顏歷九地之王氣鬱千里
之秦川雖人亡而事去尚虎踞以龍蟠北邙坡陀伊洛交
波怒焉如擣傷如之何悲哉白馬之禍舉衣冠而一盡宵
人肆忿寧恤乎他鸞皇胡不冥飛卒莫逃於網羅望清流

而揮涕睇濁流而嘯歌水南有花水北無家荒涼國色慘
淡天葩衝風起兮飄忽蕩愁錦與驚霞湯湯乎汴蔡三徙
兮終敗倏鼎湖之龍去震長平之瓦解曠萬里為一虛疑
天地之欲壞文子文孫青城苦魂風悲白日雨泣黃昏陰
燐吐焰枯血長存宮百王兮何有山萬歲兮不壽石九州
兮果窮巖玉京兮獨秀惡於中原無所歸咎李唐旣遠金
源弗受熙豐一黨宣和八賊務快私忿竟亡人國言及此
兮噎吭涕無從兮橫臆草木為之不春日月為之改色小
人懷土君子懷德王澤不流下民蕩析狐猶死而首邱人
豈忘乎都邑秦人朝鮮汴人邠連不見鄉園泣涕漣漣父

僕三韓子奴桑乾于嗟閼兮乃無羽翰目愁雲乎異域淚
老目乎荒原漫搖神而振志忽心死而骨寒苟言還而言
歸豈安土而重遷烏兮鵲兮何枝可倚邱平壠徙碑折松
摧鄭不來矣鬼其餒而魂一夕兮九逝扣元關而問之彼
氣數則已定何佗倅而自私夫亡有大覺與有嘉運豈九
州之神靈無一人而與問王業不偏安坤極不終僨蓋泰
生於否而亨始於困國家方尚帝德推天元飛漢唐之龍
馭貶拓拔之鴈臣闕帝王之窟宅奠天居而覆民吾何為
乎怨嗟艱辛以熱中而疾夏為萬物而憂春也易哀為樂
收泣為笑捧葵藿之朝陽返山河之夕照

渾沌硯賦

賈侯有硯端之異石也溫潤堅潔渾然天成而不鎡匠鑿
之力余嘉其能全於樸而致於用也故名之曰渾沌而賦
之辭曰

昔先天氏之一卵全渾沌於太極有心有跡而惟變是適
方其殼不音而拘龍不蛻而蟄會萬殊於一同而納萬動
於一息忽感而化與神俱入秘于重泉贅為老石而潛風
波沒泥滓漱沕音滴湛清泚哆瞻驚而噴彩老蛟怒而
厲齒既未復于故步復見遇乎舟子淵九重而縊出判二
氣於太始深固反以誘盜靜密反以求徒割鰲膽而獲翠

落鯨肝而得紫一泓鑿而失真六竅存而不死然衆變之
天忽實大化之所使水無風而不波心無物而不起但不
離不隨不鑿不弭又焉有卵為石石為硯之異又何疑硯
非石石非卵之旨蓋必有是物以明是理必有是用以明
是體一貫而通一宅而止是渾沌硯也已故其奕輝光登
侯堂琰匣貯而色瑩淨几陳而氣張定心存而玄穎自役
大樸在而儵忽自亡散跡於墳典策勲於文章石渠東觀
陵轢秦漢孔壁汲冢頡頏夏商燼南山之松而不變腐孤
竹之管而不傷墨者自墨而不迎儒者自儒而不將舍中
和而雲淦音雨霑摧堅貞而金聲玉相霧縠披于互冰陰

鑑溢于秋陽色、非此色而妄幻滅時、非此時而寵辱亡守、
重厚薄泓洋不名不毒而其用不可量也、辭曰硯之珍石
之詭杳渺光含玉肥水知白守黑兮為石谷知剛守柔兮
為水委是以涸四海而不汜灰萬山而不毀納元氣兮雲
之根化無窮兮神無已而列諸聖賢之軌固不待蒙莊浮
屠鴛言而作訾

時張賈二侯方事
佛老故以是諷焉

銅雀臺賦

天斷漢紀誕植姦孽董則顛而袁則揭曹氏猖狂銅雀巍
業阨崑崙閉孟門巖三臺見三山截霓斷雲縵重楹而走
六龍折角徙薨頡地頑空碧甃金鎔直外隆中壯天骨柱

天崩激千里而怒長風如此之富如此之雄而操之心猶未充俾漢之天為曹氏天漢之國為曹氏國漢之民也曹氏奴漢之臣也曹氏隸漢氏之宗廟宮室燼矣而曹氏之列屋長門美矣漢氏之庭寡婦悲曹氏之庭嬙與妃聆義聲觀義旗孰知其非而操之心猶未涯既立海移山分辰斡斗負漢鼎而入魏宮結漢網而維魏臺則不也拜表植也拜章權退備隱琮降表亡不愧漢霍光自比周文王四顧無人虎踞而鬼偃忘赤壁之辱誦明月之曲笑吳蜀之僻隘鄙桓文之局促乃上重臺入雙闕慨雄姿鼓高節燕歌兮玉糝塵趙舞兮風翻雪望二喬而不見怒孫劉之未

滅謂我翼莫吾禦我角莫吾折彼神器入吾手孰敢撤而裂之哉曾不知此世此年守漢宮者孤兒泣血守魏宮者姦雄倚疊也一但懿不忠國昭不義扶濟戈投車龍悲鼎湖則銅雀之富魏宮之蓄賊規盜模一為晉所居嗚呼天既不有漢而魏復當有天使魏有天則魏之為魏亦昭然矣奈何魏反不務可作真帝逼君而生拱北以漢臣欺世而死征西乎噫欺人者不自見已不欺人人不欺已魏欺漢作是臺而不能居晉欺魏獲是臺而不能保臺乎臺乎果孰居乎不欺人者其永居乎

龍蟠若木山子賦

有序

龍蟠若木者禁園之奇石也德陵狩汴播棄泥壤遂用崩折有客過而悲之因命僕以為賦其辭曰

天蛻奇骨僵立突兀不斤不鑿而盡諸山之秀鏤造化之窟力百轉而蓄萃鬱龍蟠于若木茁元氣乎一拳露太初之面目潤涸四海幽翻萬谷尺有千仞之峭巖無一粟之俗蓋天鍾美於是備夫三索之蘊以終萬物而始萬物不徒說於人而為眼中之物也故其堅足以不磷重足以鎮躁止足以閑邪靜足以寡欲使為明堂之礎而足以柱天使為昆吾之刃而足以剗玉惜平時也非時命也非命投閑置散於侈靡之地而為游觀者所矚故默默以自容兀

兀以自足三十六宮方燄沉薰麝爭容而戰媚抹朱而綰
綠此則煙淒霧慘風呼雨沐踞長松而倚脩竹盡漢武之
雄夸與秦皇之凶獨齊管絃于天籟等山邱于華屋寄春
色於莓苔寓山鳥之一曲幾雷霆之震怒欲奮飛而起陸
媯皇逝而不返懼不周之再觸是以陸沉而不溺朝隱而
不屈巍巍乎將闔千祀振萬古而不朽不歿也豈意其山
移海倒地圯天覆虎出于柙龜毀于櫝幹神鼎而寶康瓠
逐麒麟而囿麋鹿又崩折于瓦礫復閉滯于溝瀆彼不才
之石瑰珂犖确全其天而碌碌此其將遂沉淪湫底與糞
壤同化亦將有時而出也耶嗚呼一石之奇猶若是矧抱

奇之士乎士已為楚大夫之三刑而石復為奇章公之慟
哭也宜矣

靜華君墨竹賦

君姓張氏行臺公之女元遺
山之姨姪總管喬君之妻也

甚哉物色之有異也不為丹青不為麗縵不為泉石不為
卉木墨於用而形於竹開太古之元關寫靈臺之幽獨儲
秀潤於掌握貯冰霜於肺腹足乎心而無待於目備乎理
而不備乎物全乎神而不徇乎俗蓋達者之有天趣而以
貞節為寓也若一葉一節施塗粉澤舒焉而布煙慘焉而
綴雪以規規之形似幸他人之目悅是俚惡之倣顰惡足
以知吾物色之說竹有竹外之形墨有墨外之色故與可

有成竹之論坡仙有心識之訣而穎濱謂解牛斲輪心手
俱滅而後至乎超絕詎庸陋固滯者得廁其列也於乎靜
華琴書滿家雄侯玉胄振吐天葩幽閑貞一瑩璧無瑕棄
寵光而高蹈緬逸志於雲霞湛虛室之太素曾不憚乎豪
奢其坐雲軒佇靈宇凡蹤絕天籟舉吞八九之雲夢小
淵川之干畝沛蕭蕭之神寓植歲寒于毫楮掃胸中之全
竹走筆下之風雨忽穎脫而迸裂怒絕繡而掣去何此君
之尚玄蔑青翠而不處恍一夢於藍田幻兩身於湘浦措
斧斤兮何地陋淇園之漢武揮淚涕兮何從媿蒼梧之二
女發四座之清風驅半襟之煩暑欲折枝而不得懼真宰

之或怒縱入橫出高森亞舞不步不武不繩不矩百千其
狀劍拔戟踞會于嘖呻而得於盼顧豈畫工之屑屑於此
焉而得與神奇忽恍固不與萬物同化將落落兮終古則
君之玩物色寓天趣又其紛紅縵綠所得同年而語哉辭
曰月府兮雲鄉戲墨兮淋浪震號號兮神蒼筤列數幅兮
森中堂氣颯爽兮來三湘粵惟靜華之比德兮秉貞節兮
凌霜

怒雨賦

巳酉五月十三日

蟾骨畢而膨腴箕侈口而饒吞帝惡貪兮赫怒氣軒軒兮
不平乃命箕伯召坎師轉陰軸翻陽機鬱抑乎兩儀蘊隆

乎四維包并乎八荒充塞乎九圍括一囊而大舉疆萬里
以長吹陣雲移海而起雙霓貫斗而飛肅肅慄慄沉寥慘
戚收兩造之和氣寒凜凜兮來逼忽六合之破碎迸金光
于虛碧震來兮號號迅擊兮霹靂轟萬乘之空車隕千尋
之絕壁勁穿心而裂耳訝踵入而頂出間剝啄之聲落似
沙石而還溼忽抑絕而閉默等萬籟之喧寂驟江傾而河
沛灑天瓢為一滴滔滔蕩蕩莽莽泱泱千里一注瞿塘峽
上急浪驚湍沕沕飛蟠從天而下底柱山間紛秦堅之百
萬避晉玄之五千怒夫差之水犀旣射潮而矢天少瑟縮
而浙瀝復誕漶以連泣蛟龍奮而不屈走陸梁以高騫蚯

蚓喑而不鳴蛙黽噎而不喧疑天地之嘉運欲覆世而一
漣罔兩驚而轉石罔象喜而跳淵溢溷中之污穢沒庭下
之蘭茝疑天地之衰運復太古之茫然稚子踣而不蘇畏
崩壤而壞垣老媪伏而不動固局束以攣拳彼胸中兮何
主宜外物之變遷羌獨台兮草堂方偃蹇而高眠為攬衣
而徐起正冠襟而待旃主之乎以忠信彼胡為乎詖偏倏
孤電之長掃賈餘勇而忽還星吐焰而耿耿月流波而娟
娟於是撫牀而下擊藜而歌之歌曰尸居兮龍見淵默兮
雷殷彼自怒而為幻我惟常而是允存而守之一心而定
推而放之四海而準又何怒之遷而喜之引也

瓊花島賦 有序

歲癸丑夏經入于燕五月初吉由萬寧故宮登瓊花島徜徉延佇臨風肆矚想見大定之治與有金百年之盛慨然有懷乃作賦焉其辭曰

楛矢飛燕遼傾宋奔中夏壯觀萃于金源鬱天居之宏麗開陸地之海山忽陵飛而阜走見虎踞與龍蟠建瓴水於河朔浩不知其波瀾沉沉覃覃旋坤轉乾赤城紫府幻出塵寰粵惟瓊花之一島突兀乎其間崑崙之巔海風怒掀劈濤頭而迸落結水面之青蓮巖巖磬磬僵立孱顏疑如鰲頭冠日觀而却走偃如鱷鯨本背負月窟而橫高寒頂其

有廣寒
殿故云
瑤光樓起金碧鈎連斷霓飲海頡地頡天華陽九

州之塵

遼海百年之蘊烽湧煙填慶雲佳氣郁

郁芊芊時屬清夷天下晏然倒淮南之戈而荆楚帖崩統
萬之角而安西安神武不殺而日趨於平泰信誓旣結而
無事乎開邊明珠白雉不召而麋至蒲梢駮耳無用而復
還一人高拱於其上無所爲而樂穆清之燕大臣優游於
其下無所爲而興禮樂之盛萬物鈞化而無間四海被澤
而不偏風俗旣厚綱紀日完財不聚而富刑不用而措政
不更張而治士不作聰明而賢民日遷善而不知其所以
然而然疑疑乎魏孝文駸駸乎漢孝宣宜乎於此樂天下

之樂軼邁往而追熒軒收萬方之瑰詭盡九土之纖妍紆
青雲之環佩奏鈞天之管絃御長風於絕頂訪蓬壺之飛
僊開八荒之壽域正一氣之陶甄躋斯民於仁壽而君臣
與焉挈斯民於遂樂而君臣享焉涵浸醲郁上格於天舒
愉粹暢下達于泉濟濟洋洋殆三十年見始終之全倏九
龍之飛去隋神鼎于羽淵宗沉社債而乃屢遷雖則屢遷
竟不能永其傳功如是德如是不克負荷一舉而棄捐孰
爲之司而使之然涸金源于汴蔡卧一島于蒼煙悲風射
關謂居庸也枯石荒殘瓊花樹死太液池乾游子目之而興嘆
故老思之而淚潛蓋餘恩遺烈膏于骨髓著于肺肝雖死

赤文忠公集 卷一
而若生雖亡而若存有與析津同沛箕尾共騫者雖曰假
山而實德山也彼虐政虐世昏君暴主以萬人之力肆一
已之欲剗吾乾坤穢吾山川雖曰石山而實血山民欲與
之俱亡卒聚而殲旃寧不愧于茲焉

泰山賦

粵大荒之播氣肇天一而為水滓沉澄而濁凝柔洞蕩而
剛峙故水載乎地地載乎山抵艮茁震冠海而起為萬物
之始終藏八索之首尾堪輿之骨壯真宰之形似人皇九
頭倣載于祀禹鑿益焚神力是試條而為三別而為九祀
而為四中維岱宗獨尊而雄盤踞萬古莫與比隆衡固阜

麗瘴海極熾融颺赫赫物燬其銳華固秀拔金天肅殺一
翠橫秋萬化拳握恒亦宏富天地闔戶立都幽府固陰寒
洹粵惟茲山首出庶嶽其頂則呀突乾維其足則亘拊音納
坤絡奄東國之全勢孕日出之鴻燭作帝孫而奕大混天
胎而不鑿為有生之司命權天地之橐籥露太初之面目
愠巨靈之獰惡鰲六脊而矯首龍七襄而奮角障大海使
不流俾降邱以東作拒洪河之奔湍俾回翔而北却三州
得以完厚萬民得以土著瞰臨冀魏軒輊恒趙背左燕遼
夾右瀛鄭闢青徐之疆眇包兗豫之封略歷吳頭而益重
捭楚尾而欲割拉琅邪而橫鶩控龜蒙而回躍淪濟漯以

為襟帶汶沂以為約緒大需于雷夏洩龐澤于邾鄆秦觀
可以窺長安周觀可以窺汴洛合沓九州之半覆歷數千
餘里重覺魯強不為齊弱豈無他山高蹈磊落劍門則擅
其重閉樓石則肆其超卓天台則鬱其詭譎太行則巨其
磅礴各據地勢偃蹇岉岵如草昧之崛起據偏方而驕跋
恃區區之險固徼制外之封爵孰如茲山中華正朔建極
啟元衣冠禮樂天宇夷而皞皞王道裕而綽綽豈無羣山
紛紜交錯或繚徑之蛇結或垂巘之鷲啄或刀巖之櫛疊
或斷壁之牙過或青蓮之天開或蒼屏之玉削如夸徒與
宵民極其力而相較客氣鼓其餘勇治容盛其塗抹孰如

茲山袞冕黻珽朱絃䟽越純粹中正崇高溥博大哉乎聯
延九重鬱如深宮歸其中峯見天子之雍容前列如却後
列如剝拱捧旋躡見百工之致恪云云亭亭衆星北辰石
閭社首百鷲一鷲旣遶湧而豐隆復曠豁而綿邈扶青帝
之宮觀締玄臺之樓閣瀛州邃其幽深蓬壺敞其寥廓飛
僊飄兮遨遊抱明月而遂樂采玉芝之芳潤探先天之希
澗御絕頂之長風眇天地於目末闔扶桑之菌蠢幻魚龍
之轆轤卵長鯨於雲根巢陽烏於日脚蒼筤分其霽色鑠
紅余于碧落羲和起其龍馭駭萬國以開覺耆貺蓄而奕
奕昭靈貯而灼灼豈徒云乎高大乃與世而落莫豈呈奇

而露異等尋常之崑壑哉若夫觸石而雲膚寸而合崇朝
一雨曠旱弭虐卷舒陰陽杳不可度有如是之神儲膏溢
澤蒸為桑土衣被天下民無寒苦播為陽春狐纊天宇發
育萬物勾芒彙庶信屈起伏如嫗如煦有如是之仁既高
而大又神而仁乃于嶽麓篤生聖人續太皞之統萃奎壁
之真太極再造四時復春蘊而為道發而為文膏澤其民
堯舜其君德與山高名與山尊六經垂天與不死者存則
又與夫育蘭茝圃松椿出器車生皇麟羨金錫之利蘊珠
璧之珍者不既大矣乎宜乎唐虞盛典周漢極制巍巍堂
堂殷秩縟事後王後帝崇德報施繼繼承承垂于萬世

虎文龍馬賦 有序

乾陽萃精星列房駟健之至也故飛而在天則為龍行而在地則為馬雖八卦皆擬其象而獨專於乾坤負圖而出於河包犧氏按之為畫聖人事業以之張本而文籍生焉則又用之至也出於乾陽故產於西北陰國金天徃徃騰躡羣龍駟駿特異號稱龍種其蕃息盛大皆莫若國朝沙漠廣莫地經兩海盡為游牧之所又兼金源四十萬并西域三十國古之所謂千里者海飲川量婦人豎子皆乘御之搜奇拔異始得與御苑下乘今上所御虎文龍者空西北百千萬羣而未之有伯樂之所未見書傳之所不載古

今之所罕聞又虎變炳然有定武功彰文德之象焉昔漢武帝得之外國而親為之歌唐太宗之所御則圖畫凌煙閣而為之贊矧今生于本國又若是之異乎歌頌不作則與駑駘等為無聞敢犯齒路馬之罪而獻賦曰

天柱折地維絕東南傾西北揭隱日星為晝夜結陰陽為
冰雪死土銜沙枯山積鐵白草失春黃榆下葉洞瀕幾萬
餘里蹴踏幾千萬年蘊天馬之剛健混神龍之窟穴不知
其幾萬餘羣幾千萬匹相我薄伐控弦立國不棧豆而秣
粟不棗脯而齧膝盡風呵而雨止恣原阜而野櫜從橫散
漫優游閑適全其所天故皆越逸一兵控百百不介一力

有餘裕故皆蕃息瀾翻浪動川盈谷溢奮威靈以一戰獲
諸國而無敵迄今四十有餘年矣我君中興真龍間生一
氣直壯四星曜靈駭西域驚北庭飛黑水晦青冥碎崑崙
轟雷霆煙雲隨地列缺生獰振長風而一嘶凡馬喑而不
鳴六丁矐矐而弗執真宰辟易而弗乘於是飲余吾濯渥
注褪鱗介脫角牙食萬馬而類駁化一龍而若駟質金火
而黑章黎翦刀而互呀變乾坤之至文散玄黃以爲花會
運數以呈用來馴服于帝家頭骨隱戟面顴夾壁豎日日
出陽鑑電激膺門肉闊汗溝血滴垂梢絲齊分鬣髮直露
筋藏骨玉蹄鐵脊前鳳後兔宛轉却顧飛燕掠地輕不著

土奔軼滅沒掣去縱步東西有日天地無路倏忽變化匪
龍匪虎逍遙良善遇知得主帝軒之飛黃后唐之赤文周
王之駮駟漢武之天驥魏文之澤馬殆皆不得同年而語
矣於是帝亦惠異登進上廐一品芻秣萬乘之右鉸玦寶
錯鞍勒珍鏤金韉玉鞭服習馳驟建旆西出足力騫張渴
飲洱水怒蹴點蒼萬里一息建業興王吸絕江流瞰視武
昌朝楚暮燕載會衣裳新宮法駕金蓮正香飛龍在天遂
卻走馬和鑾雍雍垂拱而治天下視彼夸毗盤于遊畋放
心事侈躋武求仙奔貳師走嫖姚志欲無已焉則又天淵
之懸也辭曰嗟異馬兮遇主知虎爲龍兮風雲期奮靈虬

兮躍神螭隘萬里兮強一馳乾坤小兮日月低適時乘兮
加羸羈效倜儻兮呈權奇宣皇靈兮耀主威朝江南兮暮
遼西功德盛兮天人歸飾玉輅兮開金扉馬在廐兮方無
為

冠軍樓賦

有序

中統元年庚申夏六月奉命使宿州潦路霖雨蒸
厲作惡遂為稽留時東平嚴侯之弟開府于是一日置燕
于冠軍樓在城北隅西望平遠盡得東南之勝乃為賦之
其辭曰

庚伏苦雨沴氣中人壞垣毀屋沒馬滑輪蒸颯鬱攸卷局

不伸予乃斷羈思振氛翳藏天倪肆棲倚將超超乎邁往
而沛沛乎凌厲爲引領而延佇快遐觀而馳睨玉臺公子
金羈列侯立馬却坐起予勝遊越黃泥之坂而登冠軍之
樓清風脩脩火雲四收別入一天曠如三秋闊步高視覺
九州之外復有九州欲中天而上征削塵蔓與隱憂頡汗
漫以爲友翥逍遙以爲儔旁薄乎希闊徜徉乎燕休旣而
觴豆粲列吹歌疊發涼入翠綃怨生瑤瑟邊聲跌宕壯氣
激烈卷山河於霞腴駐風雲於玉節目與天遠萬象入睫
夾右齊魯面左楚越海岱連絡遡東北而去淮甸平遠轉
東南而圻聯陂塘而際野渺青山於一抹屹震南之相望

嶷鰲頭而岌業千麾霜橫萬壘星列皇輿鞏固藩牆不決
隱若長城淮海有截惟威惠之並舉俾姦宄則遯跡雖平
衍之一區固形勢如四塞伊將臣之司邊不在于地而在
于人不在于兵而在于德所以爲冠軍也玉盤醪醑遽一
再行吳歛楚謠激爲新聲淋漓參錯飲驥澆鯨酒酣氣張
心翼馮馮慨漢今昔反有累乎高情顧瞻彭城隱隱垓下
想見高帝之嫚罵項羽之叱吒騰擲宇宙而競爲凌跨白
骨蔽野魚龍戰罷孰得孰失皆爲解瓦一時偶然莫驚王
霸睢水復爲之流而怒魄邈然而化還望維揚壞堤地地
土蛇一脊千有餘里負汴水而依淮猶繚首而曳尾遺長

雲與老樹見窮奢而極侈藐瓊花於天風弔荒淫之帝子
凡以欲而從人乃保宗而延祀將以位而為憂固兢兢而
不恣詎可從耳目之欲血生人而肆一已哉其僨社沈族
身被其戮為萬世笑宜矣登高而賦樂極生悲擾擾紛紛
將安所之納萬變於一息復駕焉而還歸月在疎桐步玉
馳嘯書而為賦以寓遐眺

瓊花賦

有序

中統二年春三月制使李公致瓊花數枝是年冬十月而
夢二客相邀至維揚之后土祠飲于花下嘯歌為樂既醉
而覺乃作賦焉辭曰

江風吹雲枕，
雁霜月神不棲目。
軼思超越栩栩，
曳曳境與世別。
天宇闢，凡蹤絕。
歷蘭路，開桂闕。
飄飄乎馮高御空，
不知身之幾何而造乎虛白。
已而扶搖頡頏，
恍惚莫量。疑在釣天，
亦如巫陽孤鶴飛來。
縞衣玄裳，翩然負予。
背風翱翔，下視淮海。
雉堞相望，貝錯珠瑩。
接屋連牆，繡簾瑤櫺。
綺疏綠房，十里一市。
金紗煌煌，混灑海之魚龍。
駭飛埃而陸梁，忽丹霄之二仙。
翥青鳥以相將，指仙花以爲言。
可嚼月而飛觴，是閨苑之仙根。
來瑞世而呈芳，坼膩雪以搖碧。
刻春冰而帶黃，噴藥蝶於花心。
引輕絲而不狂，天風收其落英。
不委地而飄揚，彼衆卉則俗死。
漫紅祆而綠娼，玉陰婆娑。

徙倚徜徉清香忽來莫知其方乃誦明月之曲歌窈窕之
章倚歌橫簫鏘鳳鳴皇挹芳瀾之浩渺傾墜露之淋浪卷
瓊瑤於盃盤吸霜露於肺腸欲折枝而不敢懼真宰之或
傷且對花而舉酒澆遯世之茫茫倏焉玉女隔花而語髣
髴花神是爲花主責自瑤華以臨后土翦冰綃以爲裳染
麝塵於金縷拂白霓而下征曳秋霞而輕舉現仙姿於塵
寰寓風神於月府且曰有妹其字飛瓊適來瑤池善爲新
聲與君佐酒以薦予誠遽作穿雲振搖瓊英說仙家之幽
杏詠蓬壺與赤城闔花朝以逍遙駐芳姿以輕盈嗟胡爲
乎斯世而沉寘于此生也時予旣醉二仙亦去花落尊空

歌殘玉樹斗轉參橫脫兔驚寤餘香冉冉月滿窓戶乃爲
記夢之歌歌曰玉宇春兮花始開與二仙兮飄然而來花
亦喜兮搖搖乎瓊瑰掇飛英兮泛酒盃飛仙爲我兮歌以
累累亦旣醉兮胡不歸花滿袖兮香滿幃謂予是夢兮予
不疑嗟時之人兮孰非夢之爲

秋風賦

有序

以在舍館偶因秋風之起一時介佐三節人員皆爲感愴
故作是賦以激釋云

駐星麾於江滸歲月會于作噩漲老天之黃雨鬱餘蒸而
欲灼忽焉西南天露雲駁械械栗栗慘慘邈邈抵罅吹隙

涼冷遽作始則叱號突厲撲蠖抑蚋漸乃蕭瑟披離衝牖
動幕散宿溼于雲梢眇新聲于木末觸餘感而興懷倍陰
森而索莫既乃一時介佐塌焉而噓撫髀搏膺掩面向隅
以爲行如返如執如棄如相與愴怛怨艾咎躬責已天實
斷余行使尼止方變故之無窮則憂思其曷已或當饋而
三嘆或中夜而九徙歌缺壺而寓哀痛撫牀而裂皆金石
化而色變骨肉悲而心死余乃紓徐而告之曰士不以一
失自沮一得自熹金百鍊而方精節萬折而逾厲持此心
之亢矯奚外變之軒輕今則暑勇退涼風至困疾蘇淹抑
肆我雖連蹇宋猶有禮撫問仍存德音在耳當凌厲清氛

趯然而喜排去鬱攸攝衣躡履灑然濯熱冷然淬志快側
佇於雲霄期翱翔於帝里乘此風以成行俾照耀於萬世
何乃作楚囚對泣竟不爲魯連毛遂而漫爲宋玉之悲耶
子以秋風爲悲余獨以秋風爲樂夫以秋風爲悲者非獨
子也常情皆然門巷蕭條良人遠征傷心砧杵掩淚邊城
庭樹脩脩鴉啼柳斷帷薄生寒夢長人遠此怨婦之以爲
悲者也弱水雲沉交河日落風急霜清重城擊柝令重身
輕黃雲畫角十年不代有書無衣吞聲飲泣又下邊陲此
戍役之以爲悲者也塞北游子江東賈客去國葺年音塵
杳絕行露沾衣風吹曉月草根蛩吟喚愁啼血四顧無人

氣填心折此羈旅之以爲悲者也囊中金盡淚滿貂裘從
橫不就報主懷讎葉落尊空心事悠悠知己不見天高鴈
沉彈缺風悲長歌短吟白草荒山塵埃滿襟此不遇之以
爲悲者也菽粟青黃草肥弓勁瀚海波翻鐵山塵巨肉飽
顏酖控弦馳競一噴生風長林葉下陳合鞭鳴驍騰萬馬
破屋殘城崩沙解瓦此遺黎之以爲悲者也今則仁聖御
世霈德施惠下輪臺之詔發輸平之使二鄙不聳嗇人和
會麻麥幪幪黍稷穰穰室無怨曠之婦塗無稽滯之旅朝
無不遇之嘆戍無屯謫之苦抄騎不出烽燧不舉則常情
之所悲亦將以爲樂也子何以所樂者重爲悲乎於是介

佐相與言曰吾等之味固如所云吾子之樂可得而聞曰
可哉麗金行秋赫輪不鑠大火西流盲沴不作有風颯然
云胡不樂若夫洞庭波木葉脫陂潦盡山雲薄快萬里以
長吹卷餘苴與纖惡汎六合以澄清展青空而高闊淨兼
葭之洲渚鬧芙蓉之城郭留夕照于飛樓挂殘虹於高閣
水落而江淨天澄林踈而煙橫霞抹天痕虛而見歸鴻露
華涼而聽鳴鶴金莖突兀霜仗光寒銀字聲淒翠綃香著
泛新商於瑤瑟憂清音於珠箔際邁爽以昭曠莫不凌兢
而曲躍是其所以清也紛紜於青蘋之上夷猶於銀漢之
間激怒於土囊之口弄響於松篁之前散驚轟於洪濤發

鏗鞀於狂瀾縱生金於曲岫振鳴玉於空山虎嘯而萬竅
裂龍吟而九淵翻是其所以雄也至於蜚霜激沙撒捩秋
草白鷹蒼隼金眸玉爪飄飄搏擊氣勁心老沙場欲雪代
漠生雲驂騶紫燕渥洼龍文輕風入足赭沫追奔朝飲溟
渤夕踏崑崙尾閭潮回天池浪激鯨鬣搯山鵬背闕日乘
化起運扶搖發迹超逸絕塵杳不可及是皆憑威靈而神
變化瑰奇壯浪有不可紀極者余於是時則將掇蘭搴蕙
濯纓結佩翥非煙之冉冉御靈颯之沛沛相羊逍遙游於
萬物之表驚於八極之外聽萬籟之秋聲轉一元之和氣
舒而為春融而為薰騰仁壽於吾民厝治安於吾君是余

所以樂也子其束載秣馬易悲為樂鴻毛垂翅乘此以飛
揚巨魚濡沫快一縱于林壑也仍作歌以訊之曰茂陵劉
郎去不歸秋風起兮白雲飛余欲翔于帝鄉兮蹇予行兮
江之潛南山有萋兮北山有微月皜皜兮風淒淒有美人
今天之涯擧桂子兮今其時執子之佩兮孽子之衣兮與
子歸兮從風之吹兮子母以為悲兮

牡丹菊賦

有序

初入新館客將宋日新致朱砂紅牡丹菊一本祇三四花
慘悴萎暗不以為奇遂植之穿廊西之隙地今歲忽茂達
成叢高六七尺及秋而放數百花所未見也適正甫書狀

生朝而其花尤盛故作賦以寓感其辭曰

西風悄兮幽扃木葉下兮空庭忽異卉之呈芳乃示予以
不情郁霞腴之春姿敷玉瀼之秋英蹙絳綃于青苞翦翠
羅于綠筵折緗桃與紫微訝鞞紅與鶴翎高層層以奕奕
重裊裊以盈盈結膩黃以為心抹沉粉而含馨凝夜氣以
夸晝姹斜陽而鞞晴仍牡丹之花王強將菊以為名嗚呼
噫嘻時哉匪時造化則奪形色不移雖反常而似妖顧真
宰豈予欺寓國色於羈孤謝凡品之芬菲挾金氣於西陸
吐霜葩於東籬鄙傾城之鄭袖期佩蘭之湘纍獨超出於
羣倫不繫累於等夷特以秋而為春乃奇花之出奇彼自

爲一時殆非後時也且持盃而滃露更嚼句以待月儘吳江之飛霜甚窮海之饜雪與後凋之姚魏共終全于晚節

幽愬賦 有序

上即位之元年詔經更成于宋宋人逆之入置于儀真姦宄漏國相與構陷誣爲款兵不受書命且僞報異聞者再遂不令進退自庚申至于甲子凡五年冬十有一月宋人乃報其國喪而復無縱釋之命幽抑無紀極而莫適赴愬作幽愬賦以自釋其辭曰

天明監觀弗蔽兮奠表著以誠陳各蹈道以執則兮于坦夷兮是循惟禮與信爲通達兮俾行李以問津顧率履之

弗越兮何虎尾之啞人棘予裳而柅予車兮竟夔屈而莫
信滑溟滓以造艱兮胡構台以愆辰習坎而入于坎窞兮
遂蒙冪乎穹旻塊百折而僨于下兮墜沉坳而無極荐局
側于智井兮重覆盆而擠石鬱憤默而屯惛兮觸黜然其
若漆踏泥塗以墊隘兮薄湫壤而淫溼頓濡滯而壅底兮
疾重脛音墜以侵賊混河魚與谷鮒兮麥麴窮兮焉所得顛
連而無扳援兮仰干仞兮無涯涘責躬而反已兮抑不知
其所自粵台宗之權輿兮兆元鳥以降殷託帝乙之支屬
兮分方祊音崩于太原蟬聯而曼延兮委落族而紛綸羌台
弱植之熒特兮乃繼序乎其季振迅而自亢兮欲託始以

立世襲皇風之氤氲兮紉幽蘭以爲繫冠章甫之巍峩兮
錯瓊瑰以爲佩握火齊于天衢兮挽扶桑以載燧造高朗
以正大兮灼群昧而用晦攄混沌之滓穢兮萃元精之純
粹衣堯兮服舜仁爲旗兮義爲軻堅窮而石守兮望道囿
而日進絕蹤兮追塵弗以爲遠也探神區而挹道真軼乎
無極之近也渴日而不得留兮乃以夜而爲晝葺江籬以
爲裳兮搴芙蓉以爲袖扈辟芷以挾芳兮濯爛錦而綺繡
步驥馱于康莊兮翥鴻鵠于雲霄越希有而出大荒兮乃
度曼而絕遼汎洙泗以揚波兮扇之乎以清飈掇蕙茝而
杯灑露兮灑旭日而晞蘭茗遘靈脩之際嘉兮下弓旌以

為招謂黎元之無告兮以遇毒于荼苦方焦糜于鼎鑊兮
又薦之于刀俎俾顛連之赤子兮化白骨而撐拄血肉膏
于原野兮腐棲苴而橫宿莽閔羶兕而拏虵虺兮翳三光
而污九土朕音盡音焉其傷心兮豈為民之父母汝其為吾
蓋臣兮敷余孚于吳楚轉一氣為陽春兮暴庭魃為靈雨
包載于戈兮朕亦願為好生之主越拜手稽首兮迓續民
命則在乎茲舉畀龍節而錫虎符兮繚霞旌而凜霜仗遺
黎若崩厥角兮將慰乎雲霓之望引餘息而煦之以天吹
兮鼓太和之泱泱變時雍而底定兮鯁孤廢疾者而有養
攀三五以反旆兮輅成康而掉鞅姦宄遽為之闕塞兮慴

不知其故也方血人于齒牙兮盜憎主人而惡也音更捧余

御而不使之行兮斷予轡于路也衆梟不識夫鸞皇兮謂
予日之暮也嗥噪而各為兇聲兮乃遷台以怒也懷照乘
與夜光兮適闇擲而召疑為魚目與瓦礫兮乃翻誠以為
欺棄神鼎與和氏兮以康瓠瓠珎而為奇如射工之伺人
兮故巧發其陰機弗為社稷之遠猷兮姑詭遇於一時好
逆而寇來兮則予焉所知會衣裳而而衷甲兮執魯連為
鍾儀荐棘而重圍兮隔天日兮江之潛遡洄而屯以遭兮
設羅畢而為之縻錮陰谷而高且深兮入而不使之去也
為嚇逼之干端兮覲予改於步也奈予心之不移兮屹乎

不周之柱也。倏歲月之屢遷兮，春與秋其代謝。交一臂而
闕之兮，身乃為之傳。舍方氣數之締兌兮，予曷能與之爭。
天定亦能勝人兮，而偽烏能易余之誠。戴片天以兀處兮，
而豈能拘余之心。欲天飛而道游兮，曾不知予身之陸沉。
冥搜而坐馳兮，迅祥飈而邁。徃激九萬之扶搖兮，歟音忽上
征而遐想。將搴瑤芝于玄臺兮，愬于帝而稱罔。虎豹乃守
天門兮，列魑魅與魍魎。犬詵詵而吠人兮，闔帝閭而弗敞。
仰天而呼兮，孰讎吾民而若是之阻。修台聖非姬昌與玄
王兮，曷為亦在夫夏臺。羨里之幽豺虎縱橫兮，麟獲而為
囚。鱸鯢拉其鬚鬣兮，乃突梯乎蜃鮑。王鴟暗而不鳴兮，蜺

鳩肆其啁啾雜芳蓀于蕢蕢兮竟不別夫薰蕕日方中而
見沫與斗兮蹇予之行孰為此謀挾李順與苟純兮王驩
入室而操矛漏國而倒制兮委而莫予問也呼天而無與
言兮撫予膺而自恨也蹇予業已如是兮第不忘乎吾民
翩然還歸顧自視兮面四壁而無聞余節弊而增塵兮眇
隻影而無倫漫勞心而愒愒兮輒申旦而弗寐載命龜而
虔卜兮復端策而訊筮吉弗食而數奇兮再三瀆而莫契
鬼神亦台違兮予焉得而請於帝登天而不可兮乃益入
於地悠悠靡所薄兮曾不知其為計望燕雲而不見兮聽
哀鴻之嗷嗷靈修不可以有為兮遽遠遠而鬱陶懷馘而

孰為矢兮屹魏闕而夢勞緊眇未有以召是兮祗怨艾而
自責必操存之頗僻兮有菟惡與隱匿無乃不能制欲兮
勝于理而不德亦其饗功而冒進兮任乎重而弗克則亦
遂非而崇侈兮不能執中而過以不及或昧夫幾而闇以
顛兮窒于物而疆以塞孝不能盡親兮忠不能盡于君信
不能及友兮誠不能格夫人是用底于寔跋兮則皆自夫
予身內咎而不敢誰尤兮中隱畏而酸辛第予之所奉行
兮禮人而篤夫動也縱或有以自取兮何為至此極也哉
兵兮止殺則吾君之仁也輸平兮繼好非有惡於渠也止
予兮將焉求則亦荏禍于渠也前修與已事兮可以鏡視

而新是圖親仁兮善鄰乃為國之許謨合則所以福吾民
兮阻則為咎之徒繫天誘吾衷兮吾民之禍庶有豸行人
竟何辜兮乃鬲羈而反害夫澶淵與靖康兮于得失之跡
則固在和安而戰危兮前轍宜以為戒謂江南之文物兮
可以繼夫三代釋子卿而俾之歸乃曾不如匈奴闕太和
而徼倖兮反信用乎矯誣誤國而不自知兮曾漢唐之不
如嗟台身之在天地兮眇太倉之一粒吾君之命不辱兮
死生不足為得失和龍之赤氣兮釁固有所積也自昔怙
私而召亂兮從顛隕而弗恤也蹇台焉所望兮乃援溺而
入于羽淵時不可以驟合兮竟却走而不前苟非台之所

召兮則壞運其自天顧台所懷之貞珉兮猶未至於玷缺
故佩之杜蘅兮有芳荃以爲結擷中庭之霜華兮旆之乎
吾之節擘江雲而綴天星兮噫孤風而抱明月吸素霓與
清氛兮雖閤室而益白潔已而莫予汚兮挺節而莫予折
截玉而斷鐵兮冽冰而凜雪不欺天而負君兮庶無愧乎
前哲從野馬與塵埃兮溷狐兔而蹀血已地坼而天傾兮
猶不懇予之說在我者亦旣盡兮安得復爲之喋喋亂曰
與其惡蒙以求明兮曷若靜固以養正兮與其行險以徼
利兮曷若安時而委命兮世固不余知兮謹獨聖之令也
幽所以益吾之修兮屋漏則致予之敬也非予殄天民之

澤兮殃民者固爲之弊也

郝文忠公陵川文集卷一終

皇令及用香圖錄之卷一

郝文忠公陵川文集卷二

古詩

寓興

弄丸觀古初洞見天地心不外人與物坦白無幽深如何
妄意者肺腑戈矛森亂鑿渾沌竅遂使天機沉世失鍾氏
子孰與傳希音欲言復無言感動為長吟

靈源洞無極混混春泉瀉流為川上波晝夜逝不舍榮枯
遞乘除寒暑相代謝化機一闔闢圓方自陶冶君子惟乾
乾惕夕懼以籍勿謂吾道亡中有不亡者

思慮即鬼神所發不可妄人物或可欺鬼神其可誑山川

鬱其傍日月烜乎上化幾速影響昭晰示情狀屋漏謹操
存頃刻不可放重華尚兢業吾儕可浮蕩孳孳持此心斃
已無他望

衆變成大化總萃入神紐渾淪包無外開闔紛參蹂伊人
具斯理徃徃昧所究湮沉血氣中頓躓牛馬後哀哉何不
淑自棄甘凡陋孰能與湔拂俾見高明囿其夫豈力
世運何無涯質文繫所尚弊政與先務取舍定興喪嗚呼
周轍東王室歌板蕩虛文不知葦實禍國相望區區八百
祀猥處諸侯上

落日下西極仲尼悲死麟王澤久已熄煽火焦斯人中原

一戰場戈甲埋驚塵驅車屢途窮處處傷問津歸來續帛
編理窟搜鬼神百流收一源炳烺光日新六經垂天地一
視萬世仁

綿綿河畔柳婉婉成盤匝素絲元復黃織組為裳衣迢遙
門外路客子各所之並行不相悖並成不相夷如何墨翟
氏慟哭為傷悲

聖人無常師師襄又郟子無入不自得豈惟柱下史夸徒
以藉口妄誕為評訾當時五千言洞達窮妙理大出六合
外遠探無極始後人弗克承削繩復破軌流漫源以湮枝
披根以死借問蓬壺仙吾道誠爾爾

明堂一牘書制作本至道折衷六代典密理參元造煥乎
其為文表表垂世教豈惟得時制萬世是則效新莽何為
者剽竊資篡盜大典即委地生民弊殘暴至治何由興有
淚滔蒼昊

潛觀聖人用乃在筆削書矯矯百王法挺挺森天誅立義
本忠恕淳風還唐虞後王政苟且舍此由他途僭逆尋干
戈血肉汙皇居遂世不復古永永沉真儒

鹿門有高躅彭澤歸去來劉伶醉不知痛飲銜深盃何如
主夫子教育經濟才河汾大澤流唐運實此開彼伊皆季
世此獨何為哉

坎坎咸秦坑下有六經燼後天百代跡泯泯同一盡厲階
仲尼沒諸子各啓釁短長互相擊世主孰取信異端實禍
因莫將獨罪秦

中原二十世迥無一漢祖關中無一民沛下無尺土寬仁
代暴虐麟鳳消豺虎所欠惟學術不得同湯武擾擾草竊
盜紛紛孺兒女局促無遠略屈強何足數獨有唐文皇僅
得為英主

漢鼎既已墜海內必有歸誠能正德業亦足為王基何必
由禪讓以為篡弒資鬼操勿謂鬼百戰得偷兒征西題墓
隧永世將誰欺

太康晉一統中國威幾振天子無遠略宰貳爭欺徇清高
機務廢曠達廉節盡徃徃矜豪奢珠璧家充牣構成骨肉
禍結起邊夷覺自此中國亡罪莫加石晉

天王不巡狩高居事遊燕侈心自茲啓欲歷寰海遍陋矣
逢惡儒拜䟽請封禪名數聖無徵事典不經見萬乘歷川
谷供具窮寓縣鏤玉以銘德千古示誇銜豈知蒞藻菜足
作王公薦茂陵休著書請讀史鮪傳

周謗尚赤舄孔尼猶弦歌大節窮乃見首陽高峩峩白刃
義可蹈之死矢靡它于雲漢巨擘問學崇正軻投閣遽隕
獲劇秦真媿音寔阿玄文與法言辨口徒增多與器不與節

天命其如何

道入王霸雜氣逐山河分有才或不德有武或無文小智
私已甚竊位徒自尊患失以持祿徃徃植禍根

采采商山芝麋麋秦庭鹿商山白雲深不見秦庭骨乾坤
百戰場松下纔終局笑殺子房公幾被高皇戮

伊尹五就湯嚴陵不臣漢所履元不殊心跡孰與辨濟時
與全節亦各適所願紛紛夸毗子利欲迷生死黃塵事走
趨青山為仕途

昊天有至文倬彼雲漢章秋風波洞庭漪瀾肆汪洋嗟哉
破觚士狗辭剗肝腸執柯以伐柯元氣為凋傷千金享弊

魚目誇夜光道喪實昧昧浮僞方翱翔孰為據其華立
聖追羲皇

昂昂兩飛鳥不知何許來結巢黃金殿弄語登瑤臺吾民
競奔走恍惚為驚猜或為魯鷄鴝拜祀祈矜哀或為長沙
鵬與世生殃災歲以卵翼繁百千為朋儕山水割膏腴構
宇凌天街遂令周孔徒凍餒纏霜埃

天容恒青青日月自昏曉此心本澄淨萬事空紛擾日月
不變天萬事不變心洞觀天人際一理神幾深

草木變榮瘁松栢獨也正一色貫四時閱世還無竟咄嗟
樵蘇子仰視驚眙矐雖云梁棟姿不免斤斧橫顏天距乃

年匪道實維命非為桎梏死亦非寒餒病脩身以事天終
白為賢聖

西山有佳色東溟浩淵波區宇仍崢嶸雷風相盪磨借問
先天公吾道其如何麟鳳久不來西伯安在哉

俯仰天地間吾身眇何許百年交一臂竟自為黃土灌以
仁義波植之天人圃握蘭當靈風清芬遍寰宇可與無極
翁乘化遊千古

秋風吹幽蘭明月照寒江憂然一長嘯遺響纏飛霜有味
非尊鱸齒頰流水漿遠駕中和車高遊一氣傍濂溪訪達
叟深探先天囊

有飲不滿盃有蓄不盈握牀頭一卷書即是平生樂落日
從昧沒浮雲盡輕薄且濯冠纓塵不爽崆峒約

碧海驚蕩涵

音聿

中無安穴鱗風濤浩無際我來方問津飛

流霑衣裳顧眄潛悲辛扶桑繫孤槎不見同舟人浩歌登
日觀喚起雲中君

元臺上凌虛中有帝子室縱橫羅萬家曠蕩含虛碧我有
今借契竭來為扣擊無聲亦無臭默默還寂寂時有清風
來颭爽吹江石漠然竟無應真似無知識

瞬目一晝夜寤寐一死生為善尚不及作惡竟何成仲尼
幸知過顏子不復行君看貫盈者果莫逃天刑

皇天分四時庶類能蕃殖聖人定四經萬世扶人極率經
以事天非聖即為賢人事乃天道大經即天言下學上達
理捷徑餘無先

骯髒一丈夫鼓掌下崆峒嵩高看山色杳杳乘長風悴然
兩頰春不語指西東偶來洛下居舉世忻相從三年忽成
市遂為天地中世人竟不識耳目如矇聾問之皇極君乃
是無名公

朱絃寂無聲太羨淡無味其中還有物磊磊軒天地毫末
晉楚富眇小王公勢孟賁弱其勇離朱暗其智卷舒穹壤
間與化同無際

赤文公集 卷二 六
吾道古有統軻死迷其傳昌黎功甚勤突兀排金僊奎宮
吾星會麗天光群賢太極出面目伊洛開淵泉吾道本吾
心心在道即全但使心不昧吾道長昭然

北風

北風胡爲來掣箭飛沙石無乃化樞逆顛負塵昏塞萬竅
怒一吼土口哆一吸憤叱一氣轉大呼天地窄掃平長城
隍卷起黑山磧野馬突空走舊雪來塞北曠宇驚崢嶸六
合危岌岌中原一囊土再逐混沌闢靄靄薄扶搖黃盡勢
轉黑堪輿亦不守慘惓歸岑寂卉木盡搖落鳥獸皆竄跡
斷鴻撲雲去下有退飛鷁神鰲蔽兩目大鵬摧六翮有物

入驅除迅鋒誰與敵惟餘冀北駒驍騰數萬匹乘此振威
靈踏碎夷夏國吾民一孔僂學手重局脊住時雖不寒口
箝復股栗矧此烈烈威露頂裸以赤破屋簾不閉土挫纔
半席鶉懸肘不捨壞褐纔過膝妻陪子亦仆並日無一食
抱臂走道路無奈征賦急肌裂冰刀割肉死霜矢射骨槁
痺不仁氣竭凜不植心飛靡所薄指直不能屈十室一無
在道左骸岸積箕伯方震怒橫空賈餘力乾坤氣不平更
欲吹海立時余亟奔走欲入蜩殼夕暝排竟不前佇足猶
畏偏池冰勁作聲地底生霹靂雲飛月縮艷日落天失色
斗尾垂三星擺蕩光的樂所遇變於前頓覺所守易耽耽

道在樓磨天百餘尺毳幙重重圍光彩耀金碧氣濛翡翠
鎖香潤椒塗壁上有金貂兒衾冰驅熱疾罇俎快號呼淋
漓文錦溼長歌葉落柯笑擲千金璧四座自三春杳與人
間隔俯思心怒怒幾為吾民泣何此有二天天乎不余恤
孰能以此意沛我蒼生澤且息絲稅賦且弭兵戈役四海
一狐續家家趙衰日此意竟誰會歲月逾回遘黎亦冀休
止虺虺以颯颯黎亦冀霽止瞍瞍愈不息何日不鳴條黃
鳥鳴習習五絃解吾愠薰兮來帝室

原古上元學士

麟死九鼎淪萬世無孔孟文字糠粃餘扶藉不絕聖伊昔

大觀季天王始失政中聲入哇淫吾道孰不競金源東北
來一洗河海淨斯文甚濫觴幾墜土梗橫吳楚割半天瘡
痍僅續命伊洛遽騫騰朱張立朝廷弘肆六藝學俾與日
月並中原有奇才詞賦方鬪飢天門黃金榜赫耀動萬姓
君臣此為得父師此為令或者語詩文環視驚盼瞠孰意
元化精不遂入昏暝浚發自蔡党高步出遼夔墨浸天壤
深筆掃風雷勁絲綸帝載熙訓誥王言瑩諸公繼踵作互
執造化柄黃山與黃華雙鳳高蹭蹬清風玉樹鳴千古一
輝映有若閑閑公光彩璧月恒雲煙恣揮灑乾坤快歌詠
疊疊金聲鏗矯矯銀鈎硬揚馮李雷麻嶷嶸胥倡應五行

連麗天四海望而敬偉哉遺山老青雲動高興文林剗荆
棘翰府開蹊徑秋空玉琴張搏拊分雅鄭三閭一曲歌忽
喚劉伶醒哀哀汴蔡亡六合為懸罄此老獨巍然聲價駭
羣聽振袂凌孤霞珠璧飛欬警人宗一代文天賦百年盛
紛紛夸毗子搥撫為訾評自謂人勝天詎知天已定行行
野史成共為天下慶作噩建子月投我以照乘郿屋驚見
斗寒焰忽蟠亘經也生已晚弗及拜先正窮閭一束書十
載成隋甑學問苟有歸貧屢安足病今乃得溟渤問津有
龜鏡挈我登龍門縋我出虎穿搖搖風中旌茲始見依凭
緬思先世澤于今果無竟嗚呼世道喪欲語寒淚迸何時

倒銀漢與世開
艷艷昂頭冠
三山俯瞰旭日
晟陸海關又
源生民共涵泳

明月

明月不自照
漫作地上雪
不照蒼天心
照我多顏色
天下
一月明美人
何相隔靈波
許我浴好花
許我折滂沱
淚沾
血蹉跎望明月

黃華

有華春不開
苦愛風霜節
有根風不栽
有子霜不結
華開
難及時華落
難載色睽焉
涕泗零桃李
肯孤潔西風
一萬
里搖蕩幽香歇

古意

行行重回首 日落天風高
擊黎歌正月 曳屣吟離騷
何當御六龍 醉蹴三山鰲
一劍絕坤維 灝海無波濤

蒼玉軒

綠玉劍拔起 翠龍飛紫煙
虛簷生爽氣 六合涵幽妍
老露洗珠國 秀月涵金天
蒼茫太古意 蕭颺長風前

中夜誦書有感

日月猶不死 吾道曷其昏
天地猶不壞 吾道曷隱淪
世我實相違 贅蔓徒紛紛
有道復無鳳 非時亦獲麟
為抱大人器 願歸大人門
長劍空倚天 安得靜風塵
藜糗一鼓腹 布

褐還生春曠蕩五車書恹恹一幅巾青錢買濁醪置之老
瓦盆一醉南山頽載立元氣根

虛白菴

郭抱大素樸構菴萬物表不礎亦不楹曠蕩含幽杳中有
無名公獨立何矯矯神存一室固心死萬化了下視人間
世汙溷驚擾擾客氣賈餘勇浩然還自小紋錦裹血肉珠
璣裝僂音偻衰音衰金宮歷地軸玉觀飛雲杪一朝等黃土閱
世急飛鳥何如此菴中振古一昏曉白雲滿霜樹老月涵
風篠此色與此界昧者恒背違苟能反身觀捷徑明瞭瞭
無欲觀其妙有欲觀其微即知此菴中眼界闊多少

義士

燕趙古多豪士其借交報仇排難解紛以義相許固其俗也丁巳春余入燕得義士人一焉曰晉古跌宕於搢紳間聲名籍甚故得其為人尤詳初以蚤失怙恃著道士服杖屨去家觀覽山川交識名右王內翰白樞判魏靖肅元遺山一時名流皆嘗為之先後尤喜周急援難凡孤弱頓躓莫能自致徃徃賴之以濟一日挈壺酒踵余門而求詩余素喜奇節士聞其槩梗尤有激于中焉乃為之賦詩

疑疑一義士能激壯士肝燕市忽相逢布褐春風寒謂余

欲赴難白刃色無難義烈我克舉鴻毛輕泰山嗚呼世道
喪私智忘厚顏苟復蠅營青天井中看自救亦不暇碌
碌長辛酸為爾舉一盃萬古高風攀會與魯連子把臂觀
海瀾

鶴媒

胎禽昂藏姿仙家有高躡堪輿雪月精凋刻為毛骨金鼎
百鍊丹結為頂中物清秋喚江臯圓吭振哀玉時逐無心
雲閑向天邊出弄月過赤城警露晞暘谷還聞綠綺琴翻
翥舞終曲道人庭戶幽滿院苔痕綠春深步落花天寒倚
脩竹每惡鷹鷂忍大笑鸞皇俗誰知藪澤間甘為獵人畜

反藏媒翳機解發刀矢毒翮嫖舞仙裳著意親麋鹿左右
成犄角顧盼爭血肉有如欺世人長往謝奔逐木食還草
衣絨口復瞑目與世若相望白雲繞茅屋澹然似無心干
戈還滿腹當時王夷甫豈勝何平叔巖廊高一世危坐翻
地軸

鴈媒

雲衢眇飛鴻往來解隨陽序當夜有所次進朝有行瀚海
天山西卵育歲為常八月秋風高雖共南翔水國足汀
洲江湖多稻梁晝帶殘蘆老岸青草長哀鳴洞庭月亂
點瀟湘霜太和開冰天北去頑穹蒼信禽法天運斷不為

炎涼偶為篝燈誤縛足離江鄉飲啄養為媒朋儔總相忘
嗷嗷解愁人乃反無愁腸弋人見冥鴻矰繳潛施張置媒
使號呼投網來搶攘奄忽一舉盡羽毛皆摧戕厭然束縛
去又向雲間望嗟嗟罔民徒詭計不可防被獲反為用竭
力如鬼蜮有信復無智終自為身殃誤已更誤人不悞真
可傷

三臺

飲馬清漳曲看山上三臺爾來一千年平地猶崔嵬當時
兩京荒鄴下王業開竊國深規模根基重栽培藻幹歷太
行半空丹碧堆冰井極高寒金虎何雄哉銅雀中天飛醜

毒澆鬼魁兆已成鼎足浪戰端可哀諱死著死欺涕泣效
嬰孩分香儘遺臭臭腐不肯埋笑殺歌舞人兩耳生青苔
舜禹纔二世漢武尤雄猜公卿皆負土殿閣磨瓊瑰忍死
待仲達痴騃真堪哈誰知篡國臺即是亡國胎美人為黃
土西陵等寒灰把酒憶思王山影青滿盃高詠朔風詩口
夕鴻鴈來有詩窮無咎然自無良歎語已更賤人不妙也
書羨里祠聖聖開列於前信不阿也
周德奕世修殷道屬不競陋哉一抔土欲以厄大聖人衆
方勝天故使俟天定聖乃先天作靜幹造化柄六畫出象
數萬世立龜鏡終亦有天下羨里安足病後來僭偽者視

此驚眙眙為王以不死瞰鼎竈恣橫隨得亦隨失肉薄還
骨併何如會茲理在德不在命

去三義見太行

二年大河間胷次洶餘浪身與天根浮決漭隨下上靈槎
杳虛舟顛倒泥底樣恍疑渾沌初溟滓天水象揚鞭得西
歸瞠目為一放舉首見太行逸翠蜚萬丈爽朗肝膽張豁
達氣宇曠真宰聳奇骨頓覺天地壯茲山自佳色何乃氣
凋喪吾家在椒嶢老霧橫莽蒼松楸日樵采山靈亦悽愴
何時鶴髮翁攜我躡疊嶂雖無錦繡裹粗著文彩狀山河
表裏全自古更霸王于今何索然死石徒映向在人不在

山先民語無妄行行重行行落日兩相忘

...

...

...

...

...

...

...

...

...

郝文忠公陵川文集卷二終

郝文忠公陵川文集卷三

古詩

曲阜懷古

孔林

泰山元不頽永作聖人墓
嶽麓南面馳崛吻勢蟠踞
端門血書飛梁木忽生蠹
遂成覆夏屋三千各封樹
脩竹與文楷灌聳擁煙霧
森森十里林鬱鬱九原路
燕人遠來觀子貢獨不去
秦火卷土焚漢雨橫天注
本根萬丈深枝葉四海布
斯民賴餘蔭顛沛來比附
凡鳥寧敢巢儀鳳見乃屢
緬懷掩袂時重念絕筆句
摩挲石麒麟可惜死不遇

杏壇

天地一生意孔門儘春風喜聞夫子道歌詠各雍容當時
說春王元化開無窮杏壇仁義香不見花白紅庭中手植
檜霜幹參青空幾回比歲寒亦指徂徠松有席不暇暖木
鐸搖西東桓魋怒拔樹仗劍邀其窮回車殺鳴犢擇木視
飛鴻燕居都幾年一世如斷蓬誰知千萬世遂為吾道宗
枝葉今尤多春來花更濃昨朝上丁罷醉殺守祠翁

曲顏巷

顏巷無顏徒荒煙亂榛梗奚復辨崇陋淒然想幽屏應卜
原思鄰不與端木竝曲肱儘餘樂閉戶祇退省自有正大

域直造高明境不遠獨得仁無欲乃能靜瓢飲忘萬鍾簞
食同五鼎乃令子慟哭天喪不敢請顏天未為短跖壽豈
為永不貳乃云命枉生特徵倖黃桑千年道尚有門前井
誰來洗心齋無人照止影西風散禽鳥老雨溷蛙黷

周廟

中城繚危基公宮盡禾黍惟餘文憲廟青松蔭寒礎塼壇
冷香火誰復薦籩俎厥初蒼姬王世德繼湯禹一再幾遂
微管蔡甚祿父公旦述聖事攝政輔幼主皇皇赫東征炤
炤顯西土下能開成康上能竝文武禮崇七年制樂備六
代舞更比夏商文不替羲軒古公薨葬畢郢廟食乃在魯

宛與大成鄰氣色成龍虎誰知曲阜城即是文章府

子思墓

王陵象尼山窈皇擬天闕白石六十四方正相倚疊卿雲
繞龍隧脩竹生馬鬣前却三代祖宛與聖人列乃是子思
子道貫祖孫一顏天曾始傳心授相世及大學宏綱舉中
庸性理切浩氣有孟軻六經復爲七向微三大賢聖統幾
廢絕爾來一千年晦沒無人說韓李端緒開伊洛本根揭
萬古唐虞心日月光目睫不必揮金錘拜墓即親炙

奎文閣

新宮拜小寢旋上奎文閣欄蠹紫苔深簷傾青瓦落佇立

思聖人音容儼如昨臨深敢為高莽逸不可學關里泰山
前洙泗墳林脚道德竝流峙鳶魚各飛躍靈光秋草沒泮
水清霜涸返照入顏巷無人餘樂舉手捫天星絡繹光
閃爍何時五曜入晃朗壁府廓歸馬掃攬捨勝殘沉貫索
忽聞金石聲殷殷地中作青天有太陽莫漫螢火爨

遊靈巖寺

乙卯秋九月十九日登泰山二
十二日下太平頂遂遊靈巖寺

岱宗西北馳倒卷碧玉環嶽靈秘雄麗勢欲藏三山初從
谷口入兩崦爭孱顏漸疑下地底細路深屈盤仰視覺天
窄石井攢峯巒陸海沙劫開突兀仁主壇桐鯨吼西風棟
宇橫高寒石龍噴清泉灑落几案間脩竹掃山色瑩綠穿

雲根丹鳳饑不來寂寞青琅玕上方在天上下視無塵寰
空霏鎖霜樹翠錦蒙朱殷西日回清輝輕金滿煙鬟何時
脫世網掛席高盤桓靜境求初心滯慮驅萬端向晚蒼煙
合更欲竊躋攀路斷不得前矯首重一看

贈青社諸公

北風吹海氛雄鯨偃修鱗音奇皇皇擇木鳥落日將安之清

霜摧豐林枯沙沒卑枝况復天地閉豈汝飛騰時嗷嗷復
嗷嗷途窮愈多岐寸心增鬱陶拊髀潛生悲蒼茫欲問津
謾使行人嗤賴有魯連子亦在東海濱舉手謝浮世共欲
尋安期扶搖三山巔笑傲雲濤低半夜開扶桑弄日騰清

輝伊昔孔尼父亦欲居九夷世網儻可逃去去夫何疑

青州山行

薄遊東諸侯致敬多擁篲訖無安巢木歲晏復反鞞飲馬
南洋橋摩玩米芾記蛟龍郁蟠拏劔戟磔芒刺酌別表海
亭激艷吸空翠霜風吹鴻鵠草野簇車騎日斜過雲門凌
跨方半醉垠嶮亂葉滑蹭蹬幾欲墜懸岳半過面絕澗黑
無地入險難遽止眩運不敢視層崖宿山家坐久猶膽悸
居民畏馬嘶游子喜犬吠汲遠終夜喧月斜人未睡紫關
見星稀枕石餘蘚膩酒散身逾困飢透食有味忽聞炒椒
巔虎去失羸牸陰森木石怪慘冽霜露氣黎明轉重崦呀

互急幽閔繚繞天一線陷日孤光細嵌隙深且蒼白晝悲

魍魅過午纔得水飲漱解鞍憇却是城西河山間更清駛

彎環折鱸腸詰曲亂之字跋步重跋音涉深淺頻揭厲林

開見石田數頃牛角銳淳俗久深居見人但驚避農婦帛

纏頭應門聳高髻破屋有村翁無言但流涕舉鞭為撫摩

俾說山中事都因七十堦鹵莽各稱帝實戶三百萬食盡

猶未弃白骨與山齊查牙誰與瘞幸得脫齒頰瘡殘餘一

臂年來立海州遺噍更疲弊邊郡增仇敵深山無子弟聞

此不忍聞愴况復噉噉海岱稱東秦山河號十二峽口吞

穆陵渤海卷無棣初從霸國後往往口逞兇獠號公死巖邑

恃制殆非計祇爲殘民區每啓姦雄志窟宅多龍蛇桃源
難避世數日出脩阻川途漸平易雲梢見萊蕪孤城隱霾
曠回視青萬疊乾坤屹軒輕穿出過徂徠背轉逾汶泗泰
山正面看益見崇高勢目中好全齊蒯生莫兒戲爲告慕
容超勿謂燕得歲

界墻雪

不用體物字昌州北
金人所築界墻也

陰風簸長嶺坤倪忽軒豁嶙蠢生鐵雲黯淡死灰潑初來
雜沙石硬顆傾碎雹旋轉迸玉屑一噴勢愈惡勁發萬弩
齊激去掣箭鑿委積皆重搭背左著點剝道緊不暇飛滾
滾互團諾蟠空凍相粘連締渾欲閣漫天都一片奚計席

與陷何處覓界墻人間無海嶽顧盼已數尺氣偃驚駭愕
慄慄寒作威稜稜痛如斫模糊半垂面酸楚欲拆脚我馬
不得前我僕指已落重繭頓覺輕透骨江紙薄挾纊殆兒
戲豐貂亦纖弱向晚耦陡黑陰雲肆饕虐橫空怒潮頭歷
地塌天角平拉老鼠山倒卷鴛鴦樂刀槩走柔然金鼓塵
衛霍竟夜遽呼號乾坤碎磨錯車從谷口沒人在冰底
黎明遞相尋堆阜各挑撥還聞頓足歌彎弧盡欣躍正好
射黃羊何須待消鑠長嘯蹴踏去天沙蕩寥廓聲繞霹靂
絃查牙競禽縛平地深虎穿更不用增繳瀝血嚼紫肝流
嘶飲紅酪雪盛馬尤肥皇天助幽朔資賦不畏寒自得生

處樂可笑羸秦初更嘆金源末直將一抔土欲把萬里過
隱墻日避冷手弄不龜藥救死恐未能奚暇更守捉况乃
天道北斗極重旋斡黑雪是長安飛灑過汴洛突兀無與
強萬古入陰壑為告党家兒惟當守盟約君看銷金帳豈
是疆戎索

獲鹿新居哭元遺山

殘山遶荒城慘淡帶餘雪我來問新居欲語還哽噎搖搖
識風旌掩掩淚隱曉額地升中堂痛激肝膽裂鼻若閭闔
風幽冥忽穿徹空牀一束書不見文章伯愁馬喑不鳴老
僕頓欲絕嬌兒背面啼高弟展轉說有書未絕筆有傳未

卒業靈輻已西州壯心空北闕緬思從公遊灑汗飛玉屑
振筆青雲開炳烺寒電掣鯨吹濤山回隼厲霜鋒擊蘊情
入軟語婉藹幽更切鶯啼柳陰深百轉春不歇方張大庭
樂誰意成永別徙倚扳庭柯窓戶轉寥寂乾坤入凋喪衣
冠少顏色魂來暮山青魂去暮山黑城頭老畢逋底事悲
破月中腸元易感使我心欲折

登昊天寺寶嚴塔

旭日燒銅輪赤氣繞車轂平步登青天陸海一龍窟寶藏
沙劫開突兀翻地軸瑰竒入霄漢締構窮土木高穿翡翠
籠直到蓮心出錯落金鯨鱗蹭蹬木虵腹致身知幾層但

覺重錦束巧碎雕鏤心力盡撐拄骨合脊三天神倚疊萬
國佛丹青雜珠琲新若手未觸盤盤老風煙天門鎖寒玉
乾坤一柱旁日月互生沒六年五入燕空為眼中物于今
始一登頓覺超凡俗曠宇凌高寒飄飄肆遐矚海卷碣石
回天厯陰山覆瀘溝一衣帶居庸險何足蒼蒼金臺雲青
青薊邱竹昔賢今不見悵望空注目下視極羽淵黃熊尙
盤屈窟宅幾千祀潛姦富凶毒魑魅不能禦何人與驅逐
燕雲割山河神州疆理蹙稱臣又呼父萬古天王辱一登
還百憂慘淡意回復安得脫世網對此傾醺醪慷慨澆心
骨醉向天邊宿

贈劉茂之

昔歲余先子辟兵淇衛間以雨壞垣歷其腰股滿絕不
知人者數日醫者以良劑飲之而愈甲寅夏故疾復作
號呼晝夜殆不能堪全真者劉茂之飲之以藥便血數
斗而愈丙辰夏得風疾而小便結塞十餘日臍周左如
覆盃狀醫者殫技莫之能淪茂之視之曰是針不能達
藥不能及有一術可愈乃以手按摩自章門至于氣海
頃之血溺并出出數斗乃愈先子生平疾病者三而愈
於茂之者二是先子數年之命茂之延之也茂之滿城
人名至臨嘗遇異人授之方技而不自售遇有疾者哀

其苦而閔其窮即為治之無不愈顛連無告者日塞其
門而不憚也雖為全真道而喜交遊灑落通敏不滯於
物曾次洞豁廓無梗礙而其蘊蓄有非凡夫所能見者
余喜先子之事且嘉茂之之為人乃為賦詩

道進物我化技進心手忘飄飄子劉子道技皆所長委世
欲長往顧瞻仍彷徨吾民吾同胞顛頓真可傷以道引汝
年以術藥汝瘍生死且骨肉下手開膏肓譬如庖丁牛游
刃不折芒舉目皆全人仁壽涵八荒惟天畀先子兩厄皆
再康晏景回桑榆庭戶生輝光我欲借君術醫國還虞唐
彷徨張四維突兀宏三綱緬思何可得謾自推肝腸山林

有高躅注目煙霏蒼何當把臂遊深探先天囊

隨州

山南楚甸拆漢東隨為大盡日涉艱阻極力出險隘川途
落木杪忽覩天宇快長林偃秋色百雉露茫昧疑向遠水
曲隱映脩竹外捷去不得前橫亘斷崖礙煙深梅欲春石
亂水相帶飛鳥不知人投樹聲甚怪探騎隔岸言轉出西
城背火壕削紫土斬絕黑欲墜當時不受攻例與安陸潰
居人盡室去涵養儘一敗荒空二十年繁夥日蕪穢白堊
餘屋壁狐狸窟庭內穿窬棗枝曲倚柱巖桂壞誰種當道
棘亂長侵階菜與室沒蒿萊何處覓粉黛溼氣雜土腥當

晝半暝晦相國來秉鉞下令急翦拜佇馬開天荒欲復太平代勿謂少師侈今有季良在

石門

霜風赭諸山重崦黃榭映東南漢川盡萬疊復嶺亘甲士
斫前路呀轉崗坂競登天忽落井急注繚一徑翻身伏馬
鬣植立上石磴覆地露葉滑摔面樹枝迸斷木餘高盤蹶
步復拉脛楂竹磔青耳剌刺蹄血凝石梁僅尺許絕澗陡
色暝萬衆急相擠失脚如墮甌前抵雙石門扼塞兩窟丛
不虞為申驚傳呼空谷應大洪宿重兵栲栳相矐矐木蘭
與白兆左控復前迎漢淮此要害敵人必來偵部伍各整

頓介冑聽將令遇敵毋妄動涉險更安靜如律以次發不
鼓氣益盛崎嶇得隙地稻塍土脊硬匍匐拔劔刃湏洞下
泥窸回看半天乾却欲上危■日斜布營壘煙起衆已定
反思中原好桑麻展平鏡沃衍少巖邑生民樂王政鬻熊
文王師南服始數乘後來為霸國春秋每譏評一州七千
里蓋亦賴形勝六朝據上流踵武反朝廷吾欲問楚人于
今更幾姓

白兆山

旗尾拖澗雲鼓行斷橫谷敵人隔林望坐甲不敢出白兆
有居民煙蘿蔽喬木負擔來迎降馬首爭蒲伏為聞不殺

令又復治安陸萬死乞餘生焦土覓舊屋老人翻白鬣南
望吞聲哭松楸却成林到此死亦足載說桃花岳醉墨苔
蘚綠每於秋月下似有飛僊讀遽令巾其巔重為賜米肉
偏裨好護送縱歸不令宿喜氣動江山迢遙肆遐矚安得
與李白雲牕對脩竹

雲夢

群山避鄢郢霜淨楚天遠秋色浮鴈背風水蘆花滿陂澤
通江湖田岸藏町疇橫匯淵藪大散漫稻畦淺積煙晚翠
重老浪虛白卷乾坤入涵混魚龍深宛轉殘嶺土崖斷餘
浸黑壤輒平崗縹中洲濶甸負長坂勁竹密如篔簹粉封

紫筇忽向青楓末半出黃檨峴北人有圖畫却向此間展
選鋒一萬騎掣電鐵滿眼更不顧虜獲直向腹心翦昨去
今飲江埽道草盡偃何處仍三戶踐蹂殆不免荒莊自池
臺寒蔓相挂胷鵝鸛不知家悠悠忘還返注目浩無際馳
想首重俛何時結茅屋老吟寄殘喘濯纓謝漁父瞑卧汀
沙晚

青山磯市

渡江不殺降百姓皆按堵羊羅到武昌相望兩舍許井邑
聯亘長橫斜纏水滸青山一聚落中道勢幽阻通衢萬家
市巴商雜越旅背面千檣洲漢陽對鄂渚絕岸斷鰲立崩

濤高觜吐竹樹深且密石頂還戴土傑觀復傑出層楹瞰
全楚薄暮重登臨道者貌甚古開軒具盃酒江氣滿樽俎
萬里西風來飄然若輕舉

歷雲亭

重嶺繚郭峻高亭下臨鄂艤艫斷江流甲騎蹙城脚拒命
始進攻鐵匝長圍合顧已無頭陀徑欲椎黃鶴謁王登巉
巖再拜瞻日角王氣歷江山曠朗天宇豁十月汗沾裳敷
奏初不覺詔賜金叵羅禮酒焉敢嚼絲綸重開喻滿面春
風著撫膺還自頌不負生平學須臾動金鉞猛士徹虎幄
龍起皆雲從青山萬馬落

黃鶴樓

江漢天西傾斷岸感寒雪石城踴高樓瞰臨勢縣絕雲夢
吞八九沅湘在睂睫層軒掩石鏡更欲歷大別干帆落山
巔萬檣擁舟楫中天卷晴嵐不與人世接縹緲多飛僊超
搖有遺跡前岳黃鶴來重與添顏色丹梯插青空萬丈生
金碧聞說呂洞賓題詩滿新壁至今起香霧恠字人不識
仙語龍蛇亂醉墨江山溼有時橫長笛吹落漢陽月洞庭
與彭蠡一聲勿穿徹我方溷戎馬對面兵塵隔焉能載酒
上雲間覓僊客當年禿髮翁幾回喚李白不見狂處士亦
爲重嗟惜高賢共長往矯矯不可得落日聽江聲西風冷

蕭索

渡江書所見

已未秋奉命宣撫江淮自鄧南入新野蹈宋北鄙渡泌
河及湖陽入于春陵陂塘聯絡畎澮縈屬村墟葺翳荒
室不可行佳木脩竹奇花異卉櫛比林莽間怵然有感
於中而取野蓮荒竹秋欄野菊四者姑以寓感焉

野蓮

陂塘渺煙蕪秋波淡浮空蒹葭雜芙蓉依稀見愁紅輕銷
露華涼亭亭倚西風金粉亦自香霞腴為誰容無言恨最
深失偶情更濃搖搖似相招為喜詩人逢翻思彼桃李反

在羅綺中復憶巖下蘭綠葉翳荒叢西子出苧羅原思老
蒿蓬萬物在生處莫謾仇天公

荒竹

荒竹遶廢宅高下隨女蘿新梢入林莽迸葉揚條柯玉骨
清且癯埋沒還奄阿病綠煙慘悽枯黃雨滂沱劔斷戟復
折壯士空悲歌伊昔主家安森森氣相摩籜龍起雲雷平
地煙霄過幽香澹庭除靜陰延綺羅一自兵塵生人去斤
斧多寂寞秋不實飢鳳將奈何

秋桐

高秋江漢波卉木入搖落荒林擁孤桐蔓草重繞縛淒迷

氣日喪憔悴葉自脫黃凋脫風吹青裂饑鳥啄無時亦無
儔幢幢老陰薄儀鳳安所棲宮樹空寂寞謂汝無自傷植
根亦嬌弱豈能持風寒况乃失所託何時此焉居揚鋤翦
荒惡攜幼攀庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野迥
幽姿清岡斷寒艷接絲蟲腎青苞啼蟹抱枯葉灑露積玉
華層層擁金屑我欲摘以杯飲之灌中熱霜栽郁高標胡
與荒穢列嗟爾夷惠儔玉質難變滅不謂無人看便使幽
香歇安得老瓦盆坐對澆古月

郝文忠公陵川文集卷三終

郝文忠公陵川文集卷四

古詩

朔龍蜚冰天瀚海開日月萬國入尺筮海外迄有截東南

天一隅區宇獨限越我鞭莫及腹我車莫通轍阻山還據
 江深遠極亘絕桓桓天策王建旆秉鈇鉞睿衷推深仁不
 忍遽翦伐弘霈縱俘囚下令明不殺威銳極晦蓄龐恩肆
 霑洽彼乃執信使謂令旨所差張天鐸也徽鄙闕偷刼本以禮義期
 誰知重驕跋王乃振師徒揚旗馮太白東西兩距海百道
 相綰結幹腹出大理上流下開達夔門勢扼吭通泰潛擣

脅萬里常山蛇首尾勁相接八月馬首南王氣快軒豁千
麾繞清霜萬蹄碎踣鐵高天四旁開厚地一道裂西風楚
山空豺虎皆遯跡驥怒憑風嘶一噴飛亂葉羅泐覘江津
輕舟詰朝發清波乃舒徐大浪還妥帖中流笑前人浮梁
與荻筏白魚入王舟瑞氣浮桂楫曾莫一矢遺諸軍報鱸
捷談笑過江東兵刃渾不血居民盡按堵王師有成法駐
軍武昌南威聲轟霹靂申令仍緩師天衷有餘恤彼昏還
犯順投袂安可及文物三百年衣冠本無敵誤國不知罪
虛文猶論列誣以敗為功負以勝為說欺君還毒民何以
救破滅右師滿湖湘左師益巴峽江滸連大屯淮南擁驍

甲當朝大冠莪于今有何策外勝常以力內強惟以德乃
今并棄擲本拔原自塞伊昔澶淵回信誓始寧謚貽謀燕
翼子海內日富實中平或生虞南北動疆場鄭公慷慨姿
開心見肝臆遼主亦爲動相視指天日竟無海上盟二帝
終失國後來秦太師始悟前王失尋盟息干戈好聘堅金
石百年享安榮而反加罪罰經術日窮奇國論甚迂闊賢
王本寬仁於彼欲存活而乃極擯蔑激怒爾何益嗚呼天
王統紀綱萬世一文物與禮樂百代更累積一朝遂塗地
吾民作何物厲階大江流天地限南北兵爭無時休血與
江水赤混一纔四家千年儘戈戟何當斷其流舟車到南

極

宿汝南道院

虛庭淡黃昏折梅見新月徙倚爲長吟幽香有時發枯葉
鳴衝風花間動殘雪悠然憶故山風塵信音絕矯首天一
方踈星鴈聲噓

浮山堰

斷磧呀石蘊長亘青迤迤蜿蜒繚彊蛇鑿罟橫齟齒淮流
從天來撇捩過一矢氣怒猶不平直欲卷遺址蕭郎真耄
期見性不見理日暮乃倒行平地成洛水赤子生魚頭百
萬並一死雖無殺戮名亦與挺刃比麩牲及菜果小惠徒

自喜梁宗不血食
餒鬼未報此侯景
登明堂降罰亦天使
哀哉無辜民朽骨
在餘滓霖潦秋煙深
煩冤掛踈蒿浙瀝
生悲風慘淡動遊子
白圭壑鄰邦遺誚
今未已水可亡人
國斯言厲階始為報
移山人愚叟真愚耳

冬至後在儀真館賦詩以贈三件使

突兀天壤間洞視及八軌
區宇入割裂疆場更彼此
闕怒尋干戈禍亂無期已
孰能著手援下石徃徃是
予方閉關居不忍安坐視
復有弓旌招颺然為時起
仁義一萬言麻鞋見天子
天道本好生天顏亦為喜
乃曰哀吾民去殺兵當弭
今日踐阼初急務惟爾耳
三人奉書行一信盈尺紙

詔下癘老泣春風動田里入境及淮壖肺臆即開披剗薙
撤籓垣羅列倒瑚簋萬變惟悃赤一念無倖詭白虹晝貫
日清江秋見底行人不能行在所輒頓止一自入儀真改
館七牢美坐使庖丁勞徒增魯連耻空庭重咨嗟閤室還
徙倚蹉跎兩朝事慘澹一江水堂上接玉帛何如四郊壘
萬衆七奔命何如一行李新陽復生意歲律已窮紀節候
中易感挺特入骺骹折梅愧皇華對酒生顙泚蒼生苟能
活志士豈惜死願借君懸河發我弦上矢天下本一氣南
北只一理處置一何難鴻毛扇糠粃中原帝高光遽可遼
金比君家祖宗法親仁載良史可令富鄭公樹立太平址

一若泰山安一若九卵累事幾或一失千載貽詬訾中間
樂禍徒沮遏逞姦宄以為富貴鉉瞰鼎磨血齒高天無風
颺側佇羽翮俟激怒起兵端馮鋒肆蛇豕皇皇仁聖資比
復當謹始發言謾盈庭執咎誰敢爾是非在目前胡為眩
紅紫政如道傍室牽制終誤已區區謾多議紙上何足恃
出門懼垂堂何嘗見邊鄙睽孤還自睽見鬼急張弛一斷
即遇兩群疑皆披靡天運屬安治何當合離化不能鷹脫
講還成肉在几盤殮寧忍食欲斷南八指

儀真館後園感春

深庭日清亮卉木欣東風冉冉蒼翠香過雨溼青紅天葩

擁纖妍膏沫誰為容
蛺蝶太放顛百匝
遶幽叢自謂擅春色
豈知吾汝同一夜
落花深綠苔香錦重
我來藉醉眠仰而聽
遊蜂悠然發
驚省桃李不如松

繁李夜逾白
條楊先時青春深
百草長靡蕪滿空
庭生恨復喚愁
况復聞啼鶯
心事觸處傷
有花還無情
朝光紅露晞
暮色紫煙晴
新燕嘲春梁
歸鴻眇雲聲
何當理舟楫
麗日清江亭

風花點白紵
香露滴清晨
幽樹靜益鮮
虛庭寂無塵
亂草縈階除
蒼苔老餘春
鳥鳴隋紅英
軟軟著襟巾
翠碧挂黃棠
飛去誰家鄰
陰森現畏景
綽約逢花神
回首碧雲重
紛

紛擾天真

三月花更愁一雨香百和綠英堆狼籍紅蕾愁亦破冉冉
物花暮紛紛蜂蝶過幽事關心深愁來藉草坐春去酒樽
空尚有餘花隨世路足迤邐人生多坎軻徙倚盼殘柯吁
嗟果奈何

幽蘭三伴使致蘭二本感而賦詩

春山好鳥鳴淑氣扇芳樾林深草野迥宵與人世絕猗蘭
郁幽姿心馨忘目悅薈蘄祇自全荆蒨甘與雜靜深反致
寇輕風遠香發虞羅斷芳根逢諛李桃穴本非華堂姿衆
卉同搢擥不逢汨羅臣又失長沙客上官增青蠅鄭袖逞

顏色薰猶臭自長蕭灑煙霧質竭來偶相看慘淡初未識
 却疑子羽寢三嗅清香泣坐久忽目成江雲滿窓白重吟
 遶雙叢一花還一節青金呀鳳觜紫錦卷驚舌我欲紉以
 佩愛重不忍折呼兒課楚辭諷詠思比德所貴香不淫時
 至酷清烈所恨失所來好玩反爾賊何當煙雨深還山種
 明月

橄欖

南人謂之格覽

南菓足韻勝北人罕為奇銀盤獻青子愛玩驚見之蓮房
 飽出螭棗滑生下枝翠粉苔埽音亭新清烈凝松脂齒牙噴
 艱澁苦硬不可持氣韻久始來靈根淪天池灑然凌青颺

甘露濡仙芝有如宿瘤妻苦節真可期亦如相韓休朕瘡
天下肥危辭遽逆耳終自為良規先難阻欲速後得卒莫
違默默心語口此樂夫誰知始覺衆果俗橘奴復梨兒海
嶺瘴天黑異味翻茶飴雨露存天真颶霧不可滋島嶼出
乳泉造化亦若茲元氣舌本甜酸苦歸涕洟本來甘受和
衆味相假移居然復其源僞妄焉能欺何當謝世網兀坐
忘奔追深山石室空煮石療調飢破鼎煎春芽嚼此吟湘
纍脩然沃肺肝看山坐支頤物表有真味載歌采薇詩

秋思

星麾重霜露落月窺弊裘久客心易傷况乃逢暮秋誰知

楚江邊即是窮海頭赤子解虎鬪先拚十二牛太阿授楚
柄濤塗竟拘囚昊天有肅殺未肯休戈矛書生本迂闊國
計無身謀俯仰但不愧萬事從悠悠

燕南二十年閉戶鑿混沌先天探首尾立志極悱憤衣帶
歲不解彊勉忘怠困落筆一萬字開卷即立論不知世代
遠但覺聖賢近學問期有用匡濟展底蘊微車賁邱園螿
窟驚一奮使行還尼止江邊坐孤悶

江聲萬馬來勢欲衝夜枕志士足多感坐起安得寢靜聽
風雨急透骨寒凜凜湖湘湊遠浸巴蜀動餘恣誰令隄南
北汹怒欲相諗落落弭兵心于今成貝錦薦玉期捧盤隨

甌如拾瀋樽中有瓊花明朝且轟飲

木葉隨積水西風白鴈來祇應破月底曾過黃金臺昔年
弔荆卿臺邊把酒盃落日督亢陂莽蒼秋雲開浩歌易水
寒晚山青崔嵬誰知坐江館兩見飛鴻回空庭日徙倚慘
淡生莓苔援溺先隋井計拙良可哀

弱冠燕市游許與皆豪英百匝紅錦圍酒海橫長鯨醉倚
薊邱竹長嘯秋風生有時按策坐談天復談兵劃破天心
胷四座一時傾今來閉重門但聽擊柝聲乾坤惡喧聒竟
歲喑不鳴何日九地雷決裂重一轟

昔游東諸侯秋晚登泰山佇立太平頂超然出塵寰日觀

望吳越浩渺秋雲閒長風漾江海天末生微瀾今年坐舍
館江聲滿重關却如在幽陵脩阻不得看好花靜有色相
對婉且閑無由寫哀怨日遠歌幽蘭

儀真館後園海棠兩花于秋因爲小酌賦詩

二年海棠秋幽妍對寥索霜後輒載花枯株吐纖弱化工
爲詩人故令造物錯木落出奇芬風度亦不惡尖黃簇短
葉膩翠光欲鑠蹙縮包紅粟殷濃入深萼稀疎生意怯靜
麗尤綽約飛絲罥青蟲蠨蛸共聯絡深閨養春嬌霜花滿
珠箔賴得西風輕微薰小陰作盈盈出宮妝新寒翠綃薄
空庭自顏色含恨誰附著息亡楚無言意婉心不樂琵琶

怨昭陽所遇非所托獨有未歸人相看慰孤酌却似海南
時坡仙政漂泊有酒仍有花世事且高閣後時亦何遲適
寓今猶昨香霧霑新橙傾酒兩螯嚼銀燭更高燒秋花易
零落

甲子歲後園秋色四首

鷄冠

夷則播新律卉木協秋候綰結流火餘的皪金天宿叢叢
列庭除摘摘儼雄秀炎帝朝火官絳幘軒宇宙植立竟不
拜離披擁青袖奕葉初類莧吐心漸如豆脉絡引絲起一
片珊瑚瘦雲芝茁紅腴紫茵卷翠脰碎顆蹙丹砂肉綻殷

血透怒割赤龍耳勁磔還亂糝麻葉薄且聳山字缺乃覆
查牙欲成角擁腫下連味生全餘小穗展盡帶殘皺昂藏
偃膺高突兀出群驟還將早霞映欲向朝日雒月露終夜
棲風雨幾回鬪再礪復自止交退誰與救區區閑草花象
物與接構弭兵日觀戰亦是自貽咎垂簾且相忘高枕卧
清晝

牽牛

野花照天星星中花亦盛長夏蔓草深踈籬掩斜徑幽庭
日無事森寂澹相映繚繞絲亂垂點綴葉相竝金風一披
拂零露光彩競參差碧玉簪綰插滑欲迸霜絲吐冰同容

色好娟淨堂陰青錦張牆背紫苔瑩時方鵲橋成佳節當
秋孟織女能剪裁天河洗尤稱女以秋為期郎將花作證
風雨開雲屏鸞凰鏘月鏡處處乞巧筵家家喜相慶五年
江館客萬事成隋甌不能致龍節空自悲虎穿永日塵炎
蒸中暑甘卧病對花淚盈目坐起不覺暝雲漢見雙星回
頭看斗柄遙憐小兒女昏嫁俱未竟中流虞風波相見何
日更

葡萄

深院荒草長短蔓裂塼縫葡萄本西果南國誰與種插蘆
為扶持灌溉甚珍重瘦骨紫節舒龍頭青線控蟠蟠上踈

籬萋萋將遠縱遭遇雖後時取實望秋仲摘露添俎豆庶
間館人供誰知六月旱卉木焦死衆斷秧餘幾花兔強著
土擁竟作纏結枯日遶空悼痛肺渴口重乾望梅心欲烘
忽憶河隴秋滿地無歇空支離半空架串草十里洞拇乳
積城岸瀕癩接梁棟一派瑪瑙漿傾注百千甕徃歲見沙
陀回鶻正來貢詔賜琥珀心雪盛瓶盡凍查牙飲流漸氣
壓黑馬潼一日離魏關五載猶在宋見此復何時烏道目
逆送

野蓼

窳池蓮蒲短久旱餘淺淤牆隈積餘埃玉鳳秋不翥野蓼

根莖堅幸得侵沮如節葉瘦且赤靡蕪交翠箸細菜亦鮮
潔粉米糝丹素獨窳裊輕穗離披滴清露水花澹晚色幽
杳足真趣忽憶過夢澤千里渺煙樹蘆花與蓼花露錦蕩
雪絮深入芙蓉藪遠映蒹葭渡舉鞭問飛鴻駐馬嚼佳句
乃今四壁中浩渺隔煙霧日斜對幽叢聊以慰遲暮大似
辛苦蟲無復風標鷺來因援沉溺底事極幽錮屢上剗腸
書無地瀝血訴嗟嗟好花草焉用生此處祇應為詩人故
故獨不去嘗膽如啖蔗食蓼猶饕御仰首但有天志節久

愈著

新館秋懷贈正甫書狀

桂香動幽人秋草滿高牆
縞袂臨西風佇立歸興長
羈翼塌卑枝冥鴻恣翱翔
南山豈能移愚叟不自量
嗟爾遠慈顏從余使炎方
亦欲登雲衢逸足馳康莊
誰知成阻脩按劔看夜光
遂生肘腋變梟獍為禍殃
劄微仁者勇臨難志力彊
繾綣百折餘奮義肝膽張
吾徒其能人玉石焚崑岡
所幸書幣完舌在身不亡
老雨洗新屋情話對空牀
從渠讒口壓貝錦生鋒鏑
誣善祇自欺謗毀痛何傷
昨宵燈火新月落霜露涼
載續所著書靜默窺天藏
槁茗煮黑水數椀澆枯腸
楚騷不必歌仰卧看屋梁
行止有天運得失理亦常
道能全始終終得拜萱堂

烈士吟贈總領宋琚

薄俗敗風節有志亦中改舉世遂無耻逐利甘鄙猥或有
申棖慾難免市道買幾回惜魯連重為嘆朱亥襟期何灑
落高義冠千載聊復誰繼碌碌等駑駘南北以拏兵吾
徒著手解救鬪乃搏搯陷甯生蟲豸歲久或竊發亂刃期
俎醢烈士有宋君王事賴不壞賊中偶拘隔凜凜畏英采
慨然自拔出喜聞官長在館吏誘令降不語首重擺中宵
出儀真五鼓入淮海羈留故箝逼難耐莫自悔睨柱欲碎
首守者盡惶駭大官遽稱謝下拜貌磊磊遂陳稽遲故勸
令更延待方說在諒陰便對有冢宰彼知辭理屈我乃意

蘇文忠公集 卷四
十一
氣倍顧盼立功名足以起庸怠君當持此心吾亦重自罪
春風波長江停看振旅凱請鉞雪主辱為國清大憝

新館八月三日雨

氛稜積穢沴旁魄宇宙滿驕陽鑠洪爐豎電繞新館輪困
瀕雲擁決驟白雨建迅雷初喑鳴缺裂蟠空遠猛風忽著
人潑目氣即偃光恠入肝膈勢若山厯卵柱天金塔碎奮
地火旗卷連閃復疊擊黑海共旋轉群龍破壁飛驚浪拍
戶翦大舟千斛翻空車萬乘碾夜久怒益甚惴惴懼難免
童僕儘顛頓覆面不敢喘牀第等階祀無復辨深淺記異
古未有大變見亦鮮祇應和龍氣突兀揭幽顯都將生靈

恨六合忿一闡蠢爾禍國徒聞此無愧覲

新館春日書懷

天末聞春鴻梅梢見新月孤影獨徘徊踏破牆陰雪寂寞
未歸人慘澹無家節異域機穽深中原信音絕白壁一片
心青天竟難說誰將萬古恨總付江城客

歲華雖云改突兀祇此心弱質乃重負第恐力不任走馬
活斯人覆舟成陸沉饗牢耗將竭變故日益深東風吹江
聲曉日晞鳴禽從今桃李花又是夸園林

鵲鳴下空庭飛鳴行且搖飲啄還相呼去去仍相招我有
弟與妹江山鬱迢遙膝上讀書時中堂拜母朝鷓鴣籬遶竹

花翡翠巢蘭茗衝風吹雲衢兩處聲嗷嗷

二親連夜夢慘戚異平日祇應節序改思子不忍食覺來
淚滿枕肝裂刀斧劈燕紙死灰飛酹酒霜階溼遙想墳前
土歲久深荆棘忠孝兩未盡愧恨空飲泣

怨入江流深恨與春潮上天涯獨昂藏顧盼空俯仰誰知
誤國徒解結漫天網不漏一民命赤子驚攘攘徙薪重獲
戾擲秆乃加賞笑殺五子胥黃池尚爭長

舉盃對江梅酒面生春香一酌酹上元再酌澆新陽自勸
未歸人一詠復一觴中原帝仁君突兀恢皇綱緬思好生
心此去不可量自昔有天道我本無愁腸

丁卯孟春新館望南極

八年坐江館祇得片天仰厄運運迤邐乖氣纏魍魎白虹
貫黑日彗孛掃穹壤神風忽吹出新屋眼界廣前秋老雨
餘霽色開莽蒼參足玉井東去地都幾丈頰星隱江氣焰
焰光欲長老人慰羈孤驚喜意惚恍都疑夢寐中恠事非
所想誰知今年春更比徃歲朗黃閨對天狼數日見乃兩
恨無雙白壁薦幣展覲享中庭望不盡謾為拜稽顙南海
還無波北辰氣尤敞中原帝聖若太平今有象整頓高世
策道泰非技癢

郝文忠公陵川文集卷五

古詩

幽思

江山鬱幽思靜止有天光宛然褰薄帷
明月照我牀蟋蟀鳴孤根鴻鴈頰飛霜
怒怒動羈衷耿耿發清狂有萬來無端
百折縈回腸晤言且伏枕一寐成兩忘

搔首視天宇幄幕四垂碧道窮誰與言
迢然坐孤石默默心語口冥區扣虛寂
老鶴翩然來聲帶江臯溼偶與成唱和
玉振動肝臆感寓遂無窮疊疊參元極

性天入無極窅窅觀化初渾淪一活物
極盡都無餘乾坤

藏首尾坎離互根株擺拉屑磨齒出入軋戶樞遂生無量
人乃有萬卷書總萃成六經所以為吾儒

衆動劇藏蓋獨覺還發蒙揭焰開熒臺赤日凌青空宇宙
一蔀屋至明元無窮但見人物異誰知地天通君看九泉
下景曜皆燭龍昧者烏可言耳目真矇聾

有物與生俱混涵具萬象昭昭為吾天皜皜不可尚妙合
元化精屬底更無上澹然入虛明大惡滋意匠如何窮奇
徒穴蠹肆豪彊胡不觀其生未死先自喪

天幾為身樞轉幹主性情靜定得其正焉用巧與營化窟
每雕鏤焜耀開萬靈偽妄相洽陶螺贏為螟蛉反觀心地

初周匝惟一誠莫漫彊作為無本竟何成
吾身眇天地太倉一稊米洞達乘道蘊大易乃吾體胡為
生町畦祇自揭底裏戰心作蠻觸鬪物劇角抵竝行本無
悖用智私乃爾終令八尺軀瑣瑣同螻蟻

爰念算心者愈算愈無數脫兔驚處女不知竟何處豈如
千歲日坐欲窮其故清風翛然來皓月皦然去太虛自澄
湛寂歷降霜露求體與追迹抱甕渾不悟

至神妙無方倏忽驚掣電歸藏豈無所至密周匝遍君子
慎不出與民亦同患念茲即在茲過化復乘變何須七處
徵非必八還見槌碎玉連環總是光明殿

風輪載水輪天地一虛舟歷世千萬年生滅祇幾漚大吹
推濤山組練翻神洲有生當盡壞物類仍自稠漂泊往何
深推盪來亦周安得窮其原神區莽悠悠

化區一洪鑪萬化總銷鑠誰知鎔冶際園範已附著倏忽
聚散間共是一蜩殼古今都無跡曠蕩歸冥漠易簡故不
弊悠久相盤薄若言天地壞大塊何處著

凡物皆抱一太極元有兩厥初無端倪乘化互消長何人
與安排妥帖自來往萬物儘銷沉山川空泱莽秋水雙芙
蓉玉鏡花俯仰竝蒂復同根一種誰涵養

地中有晦明天體無晝夜人物互寢興擾擾爭傳舍形器

兩疣贅面目更假借化工急轉圜光景速代謝君子惟立
德乾乾擬泰華揭焉與化俱萬古常不化
誰將碧桃核種向虛空天偶然落地上紅雲滿山川秋風
實離離到處桃花然太極禪兩儀萬物相繼傳堯老舜乃
攝伯禹不與賢父父復子子一家三千年
二乃極之儀三為易真數渾然一推背竟不失故步昨朝
遶屋行百匝誦佳句日暮碧雲重褰裳自闔戶夢裏遍天
下還向家中住偶奇遂無窮總在相因處
太極易始圖先天乃心法重重自環中井井皆成八一從
孔孟後此幾無人發誰知周與邵千載合符節精窮無餘

塵表裏儘通徹青天碧玉樓影歷秋江月
太虛道之蘊太極道之體象滋本太元氣母託太始維繫
復融液有萬皆本此總向此中生會向此中死誰作先天
囊顛倒不見底我欲包無窮滿貯本然理
賦予初無私稟受各分定渙汗出大號有物歸一令羣倫
或弗從是乃與天競爾貴非吾心爾富非吾性篤恭恒自
盡慤慤言與行窮通無加損靜俟乃安命
數有本然差參五行鬼神乾坤互傾靡氣運潛屈伸遂生
無量物乃有不盡人脩短變則殊盛衰化相因向非冰雪
姿安得花柳春或欲一死生第恐理不純

元陽首庶物蒼蒼豈正色轉圓開化幾剛健乃天德伊以
體其全造命還立極往往欺以誣反復為戕賊還看仲尼
處亦是帝堯則乃謂吾不能自暴烏足責

屈平窮作問柳州怨為對蒼蒼都不聞自致誣罔罪不周
彊為住杞人謾憂墜無擊復無罅居然誑茫昧君子惟脩
身屋漏極謹畏吾心即吾天炯炯不在外

道宰藏殺幾天斷運神武剗割與裁制乃為造物主躁欲
生內兵神奇入臭腐撐裂太元體鑽穴成苦窠漫合神農
藥枉費女媧補遂成血肉運萬世一刀俎

盈盈水中荷郁郁畹內蘭
娜娜楊柳春挺挺松栢寒
資度

與余同生意最可看內恕惟恐傷吁嗟懼凋殘如何被秦
人伐木仍赭山又有跖之徒瀝血還膾肝

人生會有為事物各有義苟非吾所取千駟不一視哉哉
君子心磊磊丈夫志泰山輕鴻毛無復顧勢利悲哉患失
徒滿目惟富貴舐痔復嘗糞甘心同狗彘

道有本然分立世為大節抑抑卑高陳井井貴賤別昭布
作禮經巍哉正人極有位當自守有門誰敢越維世為大
綱少紊王政缺端本必正名大哉春秋法

姿貌爭寢揚髑髏無好醜魂氣忽登俎骨肉歸一朽中心
足良好衆羨集萬有不與死生俱能同天地以粲粲含笑

人皎皎當窓牖寧知賈大夫還有射雉手

丹砂雜青空珊瑚映瑤草瑩美絕雕飾物外天然寶元精
赤子心炯炯顏色好淨徹無點滓本真當自保光明天地
藏萬象跡如掃藹然一壺春遂古常不老

鄰里遞歌哭萬古一死生不知道之常擾擾競衰榮都為
利欲驅每被寵辱驚習中忽成敗堂上生棘荆終朝飽則
已截肉同藜藿十萬下箸難安用志慮盈
白楊纏悲風萬象總一邱前哭後還嗟相送何時休君看
華堂上幾人能自留為善已無及顧盼驚蜉蝣如何貪生
人作孽謀阻脩腐敗不可埋遺臭徒干秋

形氣有盛衰魂魄共疆弱志師疆心田天地相旁薄苟爲
物欲屈消沮不復作精成百鍊鏡躍馬能矍鑠伯有死猶
見陰燐雨中著莫讀無鬼論神全鬼自却

高山洩雲峯陸物水必具野草茁獸毛林葉開鳥羽剛柔
乘萬變天地一逆數形色每相因真宰解陶鑄一受不復
易妍蚩總天賦更教影問形陶老端慕顧

嘗觀西伯易兩兩皆反對初從消內長却向進中退止是
一乾坤倍蓰生萬類如何區中人失計即憤憤吉凶互乘
除否泰相嚮背富貴爾欲榮貧賤彼何罪

重險入坎窞心術乃凌跨靈田初坦平底處藏譎詐都因

已弗盡牙角潛締架節節生城府岌岌深罟獲厭然欺一
世巖阻無隙罅誰知方寸間乃解坑天下

見通當應遠知前必念後勿謂苟且已天地甚長久雖遮
一人目難塞萬世口輪囷南箕舌轉幹北辰斗森列甚可
畏洋洋在左右克已與不欺此語宜重守

市賈爭錐刀喘汗忘昏曉夸毗角名場提踵中忿擾復有
欺世徒每患機穽小易陽反為陰揭本都在杪儘為偽妄
役至死心不了焉知無事人獨立萬物表

大鵬欲南運北溟待天風龍神九地潛雲氣會相從有形
皆受制無體方獨通超然謝世塵杳杳遺孤蹤化冥復神

荆文惠公集 卷五
俱進退何雍容掌握起消息孰能為樊籠

天地無棄物聖人無棄人大澤生龍蛇原田長荆榛載質
遠出疆遑遑告時君有教不擇類善誘皆循循濟衆已所
任謀道豈謀身至哉擊磬心中有堯舜仁

飲水澹無味顏氏何所樂陋巷并日食至今見蕭索當時
一瓢中總是天人學無悔不違仁造道乃獨覺義理泰山
重富貴秋雲薄畏匡不敢死襟度何落落

通達有大鼎能函十二牛內可膳千夫外足鎮九州蒙童
抱束薪短焰如鬼幽勺水竟不熱誅罵增怒尤力到功自
成適遠匪坐謀未行恐有聞千載一仲田

乾坤廓奧區衆動自紛擾萬世一寒暑往來幾昏曉茲生
顧指間倏忽急飛鳥大人車輪目獨見明瞭瞭斂藏入化
宇隻出造化表道德高無極教化今未了

一理初不殊萬化各所之室中本無車門外元多岐君子
盡在我我盡夫何疑可行吾即行斯乃聖之時屢空仍自
樂途窮安足悲爲告處世人勿爲世塵欺

開春桃李花川原發艷陽盡室出綺羅燕婉銜盃觴太和
暢天地晝景方舒長一旦鴟鳥鳴霜露凋衆芳短日頽崦
嵎塞向皆閉藏君子法天運行止亦其常

鸞皇翥丹霜尺鷃捨枯株知止各翱翔卑高一何殊精衛

苦填海冤憤一何愚
鳴鳩不為巢亦自有
所居偉哉衡門士
高卧一束書曲肱有餘樂
不用長者車

死生由一陽靜陰存大樸
卓午見牆影旭日昇海角
焰焰火燎原祇畏水澆潑
區區播苗徒強把混沌鑿
黃庭衣朱衣著意皆假合
寧知歇心地自有長生藥

叔世王道缺斯人絕其綱
况復異教祛曹昧皆發狂
陋儒萬口和追逐尤犇忙
潤飾借寇兵倒戈蠹天常
或者以邪攻出筭復入筐
吾將抱六經鑿室深山藏

悠悠窮原人極上不及下
作計入鬼窟有物皆土苴
兩隄歸虛無天地亦僞假
終然禍仁義舉世一野馬
與物都無

情刻忍恩遂寡至今慕高遠誰是真識者

梁折入小成偽妄亂本真爲我亦爲義兼愛同爲仁厥初
毫釐差其禍無父君向非大儒辨喪心幾殺身誰知寂滅
術遂使無人倫巍然文章伯詆斥一何勤

日出開心窻日入潛水府寤寐不在吾晦顯竟誰主橐籥
一往來何處有龍虎癡頑坐徹明曹暗睡卓午矯揉徒自
勞謾使形神苦君看乘化者徜徉樂終古

昨夢入高寒御風驂兩鸞扶搖青羅界日下看長安烈烈
丹鼎紅紫焰燒肺肝清晨餐玉屑半夜登金壇茂陵一杯
土依舊在人間鼓掌爲一笑舉世皆面謾

夜窺古潭月洞徹天心心澁朗色界異焜燿皆黃金旁有
蔚藍叢上有丹桂林倒影下無極湛墜入幽深衝風颯然
至波蕩不可尋始知人間世有動皆陸沉

隱几罷心官塌焉偶皆喪忽在無生前窅處太古上頃之
開內目百骸洞五臟知覺猶有滯尚未都無妄遂加存養
功玉宇森萬象造化皆由吾乃見鬼神狀

濯纓厭世塵入海求夜光貝闕涵珠宮異色森綺芒采采
滿懷袖駕龍登扶桑赤鳥驚上天火曜舒乾陽回視乃瓦
礫自愧空犇忙書生莫謾愚弊帚安足藏

聖域每反觀洞達萬物情知盡理自窮祇是本然明恢廓

無滯滯靜止不將迎
翛然坐乘化皓月滿中庭
忽聞鴻鴈來偶聽風水聲
秉燭入暗室驚落東牕螢

有物莫不由萬古長安道
區區徃來者總向塵中老
年年雨灑清日日風驅掃
行人竟無迹涸轍生秋草
我欲謝帝闈離居事幽討
束載無良辰幾回問蒼昊

一念游萬仞塊坐不盈尺
片席凝塵埃顧盼竟充斥
誰知呼吸間即是一太極
有鳥鳴牕䟽唧唧和機織
偶然作聲聽出入幾自適
但令無錯應萬類等喧寂

藏舟泰山巔偶值懷襄流
忽從歸墟東直向西海頭
洗日復濯月光抱空中樓
扶踈散青紅異氣纏九州
忽焉閣寒

沙佇立令人愁明朝早潮來欲住不得留

興感思往事邈若不可及觀化推將來遽覺今為昔今昔
本無異至理萬世一不朽惟事業天地共終畢前波復後
波日夜奔注急祇是眼前水源深遂無極

景晏念慮歇支頤坐看山起來復何為結佩紉幽蘭萬事
從悠悠不愧俯仰間舉杯謝塵世月落梅花殘深江總風
波天淡孤鳥閑氣數當閉塞我亦方閉關

惟時屬屯蒙患難豈能免南北走孤蓬秋風任飄轉五年
一龕燈半世幾詩卷老吟調鬼神深造每懼淺久為造物
惡今日復洞闡無思重苦思甘心向連蹇

宓犧地中復唐虞天下泰三王當革命五伯極破壞孤秦
龍戰野塗地儘一敗既有昔時寅復到後來亥消長數相
因治亂更萬代無爲我生初委順從運會

采杞

蕪城古道荒有杞雜荆棘西風結霜腴纍纍綴秋實肥瑩
珊瑚珠朱殷明欲滴長條擁寒葉射日光的礫采采置傾
筐入手火齊溼歸來奉二親煑茗紅脂泣前秋入新館枯
枝倒懸壁冬初半青乳慘淡不忍摘忽憶采杞時樂事不
可得隻身對孤叢片影深暝色王事尙稽遲何日共子職

下得隻只機好業以深系與志王事尚奮戰向日共千無

外險懸壘冬四半青其想之不冬耐感熱采外胡樂事不

蜀人手火春壘鶴來奉二臨竟春益識立前妖人謀論卦

無跡未幾即裕敵身動難寒集惟日大節無采采置酌

無幾古並策南外路帳棘西風蒸露颯疊疊煙實眼望

天采外島...

因信獨更萬外無無好坐休委醜符戰會

新輝覆空此盡一娘鴉育昔相實身怪好來志前身遠睡

郝文忠公陵川文集卷五終王當草命五白...

郝文忠公陵川文集卷五終王當草命五白...